

Wakita na a puwatertaa Paul ge emnde a RAUMA

Ga use á Paul

¹ Wakita na yá anƙwa puwaná ba iya Paul, ya sleslera á Yaisu *Almasiihu. A dƙahite ba Dadaamiya, a give slebela-aara, a fi geni yá balaterá elva-aara ge emnde, amaana labare á higa.

² Labare á higa ƙanna wá, Dadaamiya a magamiyaa waada-aara daga werre á kya nabi-aha-aara. Daaci ta puwete ba estuwa am wakita-aara. ³ Labare á higa ƙanna wá, elva arge Egdza-aara Yaakadada á miya Yaisu *Almasiihu. Má ge urimagwire wá, ƙane ta yanaa am emnde á sleksu *Dawuda. ⁴ Am sarte na tsetetse am fáyá, Dadaamiya a farehe zlabé ádaliye á ba an ndzedá geni ƙane wá, Egdza-aara. Una ƙanna baƙemme ndza an hákuma á Sheƙeƙe Cudede. ⁵ Adaba ba ƙane palle una Dadaamiya a magiyaa ƙurna ge iya, a naba give slebela-aara ge de balatera elva-aara ge emnde a jeba umele keni baƙemme, geni a fartarfe an ƙane, a faransaarefe keni. Ba estuwa Yaisu *Almasiihu á de geva án dárádza. ⁶ Kure emnde a Rauma na a dzerakursaa Dadaamiya geni kwa geve emnde á Yaisu *Almasiihu na keni, kwá am dagave á emnde ƙanna ni Dadaamiya a beli ge itare na.

⁷ Daaci yá aṅkwa gakur use-aaruwa baɗemme, kwa emnde na á wayakurta Dadaamiya, a ɗahakurte geni kwá nja ba cufedde átuge ṅane na. Tara Eddemiya Dadaamiya, tá antara Yaakadada Yaisu *Almasiihu a magarakurnaam-aga ṅurna, a varakurteva hairire.

Paul á kátá de zhara emnde a Rauma

⁸ Emtsaadé wá, yá aṅkwa slafaná we-aaruwa jipu ge Dadaamiya áɗaba kure, yá slafaná we-aaruwa an zhera á Yaisu *Almasiihu, aɗaba ma áme keni am duniya baɗemme tá ndaha ba labare á fetarfire á kure áte Yaisu *Almasiihu. ⁹ Ba kelaa má yá aṅkwa maga maduwa-aaruwa á deza Dadaamiya, yá aṅkwa yehakuryeha keni am huɗe-aara, una yá ndaha ba jirire, Dadaamiya diyaadiya baɗemme. Aɗaba iya wá, yá maganá slera-aara ge bala labare á higa, elva a Egdze-aara ge emnde á ba an ervaunde-aaruwa palle. ¹⁰ Ba kelaazare, yanánka ṅala-aaruwa áza Dadaamiya, geni a viteva baráma mázla-aara yá daada á dezekure an namaari-aara. ¹¹ Wayanwáyá jipu ge yá daada á dezekure, yá dakuránda barka na á vaterta Sheɗekwe Cufedde ge emnde na, geni kwá gevge emnde a ndzendzedá am fetarfire. ¹² Una ṅanna yá kátá bakura ba geni mi de femfa ndzedá am vuwa á miya ma ge ware á miya keni; yá de fakuremfa ndzedá am vuwa ge kure áɗaba yá slefetarfe an Yaisu *Almasiihu, kure keni kwá de fiyemfa ndzedá am vuwa an fetarfire á kure.

¹³ Egdzar mama-aha-aaruwa, yá kátá kure keni kwá diyeddiye geni ndza ya magaa niya-aaruwa ser kwakya ge dezekure, amá sem vatena sey

ba jerje názu á piyitepiya. Waya-aaruwa ge dezekure ñanna wá, ba geni a sesse námpire á slera-aaruwa am dagave á kure keni, ba seke una na am dagave á emnde á jeba umele bademme na. ¹⁴ Una wá, slera na a beliyara Dadaamiya ge iya, geni sey yá balaterá waazu á labare á higa ge emnde bademme. Ge emnde na an wera ire-aatare na, antara emnde na weraaka ire-aatare, ge emnde a diya, antara ge emnde na baaka diya-aatare na bademme. ¹⁵ Adaba una ñanna, wayanwáya jipu am ervaunđe-aaruwa geni yá de balakursebale ge kure keni kwa emnde á Rauma.

*Ankwa hákuma á Dadaamiya am labare á higa, elva a Yaisu *Almasiihu*

¹⁶ Iya, emtake ervaunđe-aaruwa jipu ge bala waazu á labare á higa ñanna, adaba ankwa hákuma á Dadaamiya am hufe-aara ge lya emnde na fartarfe an ñane na bademme. Emtsaade wá, áza Yahudiya-aha, lauktu emnde a jeba umele keni bademme. ¹⁷ Am waazu á labare á higa wá, Dadaamiya ankwa a marateran ge emnde geni ñane á vantá estara jirire ge urimagwe á katafke-aara. Ankwa á emmara geni una ñanna sey an fetarfire áte Yaisu *Almasiihu palle, barama umele baaka, ba seke una ni ankwa puwartepuwa am wakita á Dadaamiya, a ba ñane: Edda una shansha jirire áza Dadaamiya adaba fantarfe, ba ñane una an shifa á jirire na.

Emnde bademme tá an haypa

18 Dadaamiya am samaya wá, aṅkwa á emmára ba parakke geni haypa á emnde á wanwa jipu am ervaunde, adaba ta yaa kezlan ugje ge ṅane. Nateraaṅa shairiya emnde bademme adaba tá aṅkwa keḍa jirire á Dadaamiya an emtaṅkire na tá aṅkwa á maganá itare. 19 Nateraaṅa shairiya emnde bademme na wá, adaba názu ma andze tá dise Dadaamiya átekwa na aṅkwa bademme, a maratersaa ba Dadaamiya an ire-aara, ta yanaa ba itare. 20 Ge jirire wá, baaka ura ndza nanna Dadaamiya an ice ṅgayye, amá wá, á fantuwe áte sarte na Dadaamiya a nderaa duniya na sem vatená, emnde diyardiya geni Dadaamiya wá, aṅkwa an sleksire-aara adaba kazlaṅa na a nderanaa ṅane na; emnde diyardiya geni ṅane wá, saksage, ba ṅane palle una Dadaamiya. Adaba una ṅanna, tá de dzegwánka banán ge Dadaamiya geni baaka haypa-aatare. 21 Diyardiya tsa ge aṅkwa Dadaamiya, aley kezlaranáka ugje, sla-faranánka we am duksa áte una zlaya-aatare ge tá maganá una ṅanna ge Dadaamiya. Ta yá mága una ṅanna, itare ta eksante ṅgudfiyire am ire-aatare, tá taa diseka jirire d'ekideki, tá an naha an tabedammire bademme am itare. 22 Ta bantsa itare ta emnde a enjkale, mbate ta uce-aha ba dey. 23 Zlaya tá kezlaná ugje ge Dadaamiya saksage am sleksire-aara, amá itare tá kezlan ugje ge hele-aha, umele ba garava urimagwe ba dey, umele ba yiye, umele dabba, antara názu á hulmba am áhá.

24 Adaba una-aha ṅanna, Dadaamiya a naba yaterhe geni a magarmága shagerkire ṅanna á

kátána ervaunđe-aatare na, tá anƙwa á maga duksa zherwe jipu am dagave-aatare. ²⁵ Ta yaa jirire á Dadaamiya, ta naba mbedese an fidire. Zlaya ma tá kezlaná ugje ge slendera duksa wá, itare tá kezlaná ugje ge duksa-aha na a nderanaa ñane, tá magaterá slera ge duksa-aha ñanna. Ay degiya, emnde tá kezlarankezla ugje ba ge ñane palle dem ba ge ɔkideki. *Aamin.

²⁶ Dadaamiya a yáteraa áfaba una geni a magarmága duksa zherwe ñanna á kátáná ervaunđe-aatare ñanna. Nwasha yaránya nja antara zála, tá maganá ba itare am dagave-aatare duksa na zherwe jipu zlayeka ɔkideki na. ²⁷ Zála keni tá magán ba estuwa, ta ya nja antara ñwasha, tá cebá ire-aatare an mbagrيره, tá zlavanu ba ge ire-aatare ákure muksire, tá anƙwa á maga duksa na zherwe jipu na. An una-aha ñanna, tá anƙwa fáná ba itare ire-aatare á dem shairiya á Dadaamiya, hyarephye ge zatera an shairiya, áfaba magarnaaka duksa áte unñule-aara.

²⁸ Ba seke una itare yarnaaya diya Dadaamiya á jirire wá, Dadaamiya a yateraa áfaba una ñanna, geni a sharánka enkale ge dzamete duksa áte unñule-aara, a magarmága ba duksa na zlayeka ɔkideki na. ²⁹ Daaci ervaunđe-aatare nahetenahe an jeba á duksa-aha ñanna shagerka na bademme, ba seke: Fa ice am duksa á ura, danñwire á huɔe áte ura, mága shelha áte ura, ja shifa á ura, dágala an ura, zlerma ura, mága fitenire, antara mága paysaɔa bademme; ³⁰ tá anƙwa á jaja zherwe-aatare ba

dey, ta kelaade-aha á Dadaamiya. Itare tá pesha ba emnde an zlazle, tá gálá ire-aatare, tá maga kuravire, tá njá á ba tataya jansaare ge haypa-aha umele áŋwaslire, tá fatersaareka d'ekideki ge dada-aha-aatare, antara mama-aha-aatare. ³¹ Itare baaka zherwe áte ice-aatare d'ekideki, tá an nara-aha kelawa-ju, tá emnde ndaha elva bu-buwa. Elva a háyáva baaka ázetare, tá zanvaareka ge ura d'ekideki. ³² Diyardiya tsa ba jirire geni á bá shairiya á Dadaamiya: Baɗemme á emnde a mága jeba á duksa-aha ŋanna tá de shá ba emtsa. Aley itare ta faare ba emmága-aara. Baira tá aŋkwa zleba emnde na tá aŋkwa á maga jeba á duksa-aha ŋanna.

2

Shairiya a Dadaamiya shairiya á jirire

¹ Ekka edda una ká aŋkwa faare shairiya ge emnde na wá, watse ká de dzegwánka bá baaka haypa á ŋa ma ka ware keni. Adaba ekka, ká aŋkwa faare shairiya ge emnde, mbate ká keni ká aŋkwa á maga ba shagerkire ŋanna. Daaci an una ŋanna wá, ká aŋkwa ŋuɗa ba ka ire á ŋa áza Dadaamiya. ² Diyamidiya Dadaamiya wá, ŋane á maga ba jirire ge njá emnde a mága shagerkire ŋanna an shairiya. ³ Ekka edda una ká faare shairiya ge emnde na, ka kurken ekka wá, watse ká de ŋezla am shairiya á Dadaamiya emtu, ka keni ká aŋkwa magán ba seke itare ŋanna tsa? ⁴ Emtu ká epsawa maggwire yaikke na a magakanaa Dadaamiya na, a heɗanu ba ge we-aara antara aŋkwa á faká ervaunɗe geni

ká eptsá am tuba na emtu? ⁵ Amá ekka ká ankwá far ba ge degdegire á ire arge eptsá am tuba. An una nanna, ká ankwá faná ba ka ire á na á dem shairiya vacite na Dadaamiya á de kya shairiya á emnde bademme. Nane wá, á de kyaná á bá áte jirire-aara. Vacite nanna wá, Dadaamiya á de marateránmára ge emndimagwaha geni tá ankwá am ervaunde-aara. ⁶ Watse á de pelatersepele ge emnde bademme áte názena ndza ta maganaa itare na. ⁷ Emnde na ndza ta wáva ge mága maggwire na wá, Dadaamiya á de vaterte shifa na á zleka na, adaba itare ndza tá kátá shá shifa nanna antara haya ira yaikkire á ba azenara. ⁸ Amá emnde na yarnaaya jirire á Dadaamiya, tá fansáreka dekideki, ta eksese mága ba shagerkire na wá, tá ankwá am ervaunde á Dadaamiya, ankwá zladá watse á de faterar ge itare. ⁹ Watse bademme á emnde na ta eksese ba shagerkire na, tá de nanna zladá áza Dadaamiya. Watse zuññwe ba Yahudiya-aha, lauktu emnde a jeba umele. ¹⁰ Amá emnde a mága maggwire wá, itare tá de shá háyá, antara yaikkire, ira hairire áza Dadaamiya; watse zuññwe á de vaterte ge Yahudiya-aha, lauktu emnde a jeba umele. ¹¹ Adaba bademme á emnde ta ba kalkale áza Dadaamiya.

¹² Emnde na ni garevka Yahudiya-aha na, antara tá ankwá á maga haypa an baakire á diya *tawraitá na keni, Dadaamiya á de kedateraakeda áte una diyarka tawraitá na. Amá emnde na diyardiya tsa tawraitá, aley tá maga ba haypa na wá, Dadaamiya á de

kedateraakedfa áte una a ndahese am tawraita. ¹³ Adaba Dadaamiya á de vanteka jirire ge ura ádaba cenancena názu am tawraita, amá sey ma edda-aara anƙwa maga názu a ndahesa tawraita. ¹⁴ Má emnde na garevka Yahudiya-aha, diyarka tawraita dƙideki, amá tá anƙwa á maganá ba itare an ire-aatare názu a ndahesa tawraita wá, ma diyarka ba tawraita a Muusa keni, áte maga-aatare ƙanna wá, daaci ba seke tá an tawraita am vuwa-aatare. ¹⁵ Ate názena tá anƙwa á maraná itare am zlááva-aatare na wá, ba seke anƙwa tawraita am vuwa-aatare a faterma Dadaamiya. Adaba tá anƙwa diyeddiye maga-aatare, tara ta magaa shagerire, an shagerkire keni. ¹⁶ Una ƙanna á de sesse ba parakke vacite na Yaisu *Almasiihu á de kya shairiya á emnde áte una á de banná Dadaamiya na. Bademme á názena am huƙe á emnde á de sesse áte parakkire. Labara á higa na yá anƙwa bálá waazu-aara na keni á ndaha ba una.

*Yahudiya-aha, antara *tawraita á Muusa*

¹⁷ Ekka, á bá ka, ká ura Yahudiya, ká gálá ire áte *tawraita, ká kuráva áte Dadaamiya, ¹⁸ á bá ka diyakdiya namaari á Dadaamiya, tawraita anƙwa ge kwarakse duksa bademme geni ka eksese barama jirire, ¹⁹ ká anƙwa zhara ire á ƙa ba seke hyakephye tádá ura wulfe, ka ba seke parakkire ge maranaa baráma ge edda una am tabedammire, ²⁰ ká zhara ire á ƙa ba seke hyakephye kwaraterse duksa ge emnde na diyarka duksa, hyakephye giya emnde na zlaƙe ta ba seke egdzara mesheshe am elva á Dadaamiya na, á bá ka diyakdiya jirire, diyakdiya duksa

bademme adába diyakdiya tawraita. ²¹ Haá! Ekka ká kwaraterse ba ge emnde umele, labára ká kwaranseka ge ire á ña keni? Ká magaterá waazu ge emnde geni a yaránya neylire, labára ekka ká ila na? ²² Ká elván ge emnde yawánya mága gwardzire, labára ekka ká emmága? Á bá ka, ka kelaade á hele, labára zlaɓe ká ila duksa á hele ñanna? ²³ Ekka, ká kuráva áte tawraita, mbate keni ká maŋka áte náza á tawraita ñanna. An mága á ña ñanna wá, ká aŋkwa maganá ba ka geni emnde tá nyanya Dadaamiya. ²⁴ Aŋkwa puwartepuwa ba estuwa am wakita á Dadaamiya, a ba ñane: Adába ba kure Yahudiya-aha, emnde a jeba umele tá aŋkwa nyanya Dadaamiya.

²⁵ Má kwá maga názu am tawraita wá, dem shedekwe á kure keni á magakuránmaga nampire. Amá má kwá maŋka názu am tawraita, una ba seke dakuremka am shedekwe dɛkidɛki. ²⁶ Má edda una daaka am shedekwe, amá dɛbetedɛba tawraita ba shagera, ma ɓaaka am shedekwe keni, Dadaamiya á zhara una ñanna emtu mázla-aara? ²⁷ Edda una daaka am shedekwe, amá ma dɛbetedɛba názu am tawraita ba shagera wá, á de fakerfe zherwe ge ekka edda una ta puwakte tawraita ñanna ge ekka, amá dɛbaŋka na, una ma ká ba am shedekwe ñanna keni. ²⁸ Geva ura Yahudiya áte ice á emnde-ka, una á gakve ura Yahudiya á jirire, una estuweka. Zlaɓe adaliye, dem shedekwe keni, á gakve-ka ura á Dadaamiya, una estuweka. ²⁹ Yahudiyire á jirire wá, edda una ura Yahudiya á sáwá am ervaunɗe, an belá

am shedekwe am ervaunḡde-aara an hákuma á Shedekwe Cufedḡde, gevka áḡaba ta puwete estuwa am tawraita na. Daaci ḡane una Yahudiyire á jirire; ḡane wá, á ufa-ka gálá áza emndimagwaha, á de galáná ba Dadaamiya ḡane.

3

¹ Má estuwa wá, Yahudiyire á farka ge duksa emtu? Ma bela ura am shedekwe keni baaka názu á fanaare ge ura emtu? ² Duksa wá, á farfe ba kwakya ma am uwe keni. Yá ndahana áḡaba uwe una? Emtsaadḡ wá, Dadaamiya a yateraa elva-aara am erva ba ge Yahudiya-aha. ³ Ay mi ba uwe kina, má emnde umele-aatare tsaraaka áte elva-aara ḡanna wá, Dadaamiya keni á de eptsante elva áḡaba itare emtu? ⁴ Una estuweka ḡekideki; ma emnde bademme yaránya jirire keni, Dadaamiya wá, á eptseka elva-aara buwa. Ankwa puwartepuwa am wakita á Dadaamiya, a bá ḡane:

Ekka wá, má ndahaksendahe elva á ḡa, ma ware keni sey a cenancena jirire á ḡa. Má tá kátá eksáká áte elva, shansha ba ka jirire.

⁵ Haypa á miya á maraterá jirire á Dadaamiya ge emnde, mi bá uwe kena mázle-aara? Mi bánba geni baaka jirire á Dadaamiya, adaba á fá zladá áte miya emtu? Una wá, ya ndahese áte una ta bántsa emndimagwaha na. ⁶ Amá una estuweka ḡekideki, adába ma andze baaka jirire á Dadaamiya, watse á de kyáná estara kena ḡane shairiya á emnde?

⁷ Zlaḅe ádaliye má gevge ni ḅaakire á jirire-aaruwa aṅkwa á melateru ge dise jirire á Dadaamiya ge emnde, antara aṅkwa á vaterte baráma á gálá Dadaamiya ge emnde wá, tá ṅiya áḁaba uwe zlaḅe mázle-aara ge yá an haypire? ⁸ Daaci ta bántsa emnde umele, mbate mága emtaṅkire shagera, geni a sesse jirire á Dadaamiya, á piyaṅerta uwe mazle-aara ge emmága-aara? Baira emnde umele keni ta naba ndahese emtaṅkire áte iya, a bá itare: iya keni ndansendahe estuwa. A njá ṅane á maga uwe, watse á de ndavaterundave Dadaamiya am shairiya.

Baaka ura an jirire ba palle keni

⁹ Estara á bá kure? ṅere Yahudiya-aha ṅá jateruje ge emnde umele emtu? Baaka, ṅá taa jateruka ḁekideki. Ábi am zuṅṅwire keni ndza ya bakuránba geni Yahudiya-aha antara emnde umele baḁemmire-aatare tá á ba am erva á haypa. ¹⁰ Adába aṅkwa an puwa am wakita á Dadaamiya, á bá ṅane:

Baaka ura an jirire, ḅaaka ba palle keni.

¹¹ Baaka edda á eṅkale ge cenva jirire, ḅaaka edda una á kátá ḁaba Dadaamiya na.

¹² Emnde baḁemme dzalarevdzále áte uṅṅule á Dadaamiya, baḁemmire-aatare badzarevbadze. Baaka ura mággwe, ḅaaka ba palle keni.

¹³ Názena á segashe am kwárá-aatare ba seke á segashe se á emtsa am huḁe-aara, we-aatare á ndáhá ba zlerma, názena á

- segashe am mbuwe-aatare ba seke wenye á záhe.
- 14 We-aatare sey á ndáhá ba elva yaiyaihe, antara elva nyanya ura.
- 15 Sera-aatare tsaftsafe jipu ge de ceba shifa á emnde.
- 16 Ba kelaa tate na tá degashe itare átekwa bademme, sey tá yaterá ba bádza antara emtaṅkire ge emnde.
- 17 Itare diyarka njá lapiya antara emnde dekideki.
- 18 Baaka ma lyáwá á Dadaamiya keni am er-vaunḡe-aatare.
- 19 Iyau, ge miya wá, diyamidiya geni bademme a názena á ndahaná *tawraita wá, á ndahater ba ge emnde na tá am erva á tawraita ṅanna. Daaci baaka edda una á de dzegwándzegwa bá baaka haypa-aara ge ṅane. Má estuwa, nálgaadama bademme tá de ba am shairiya á Dadaamiya.
- 20 Baaka ura á shá jirire áza Dadaamiya á ba an ḡaba tawraita. Amá tawraita wá, á mara ba geni ura á diyeddiye haypa-aara.

Uṅṅule na emnde tá de shá jirire áza Dadaamiya

21 Amá kina wá, Dadaamiya aṅkwa á maramiyá uṅṅule na ni watse mí de shá jirire á katafke-aara an ṅane na, baaka elva á ḡabate *tawraita emtsaade am una ṅanna dekideki. Tawraita á Muusa, antara nabi-aha ndza ta enndaha una ṅanna bademme. 22 Uṅṅule na ni watse emnde tá de shá jirire an ṅane áza Dadaamiya na wá, ba fetarfire áte Yaisu *Almasiihu palle. Una wá, gavka aḡaba emnde

a jeba umele palle, amá ma ge emnde-ara keni, bademme emnde na má fetaarfe áte Yaisu Almasiihu na. Adaba emnde bademme ta ba kalkale áza Dadaamiya. ²³ Emnde bademme ta ba emnde a mága haypa, ta yiyiye an parakkire á sleksire á Dadaamiya. ²⁴ Amá Dadaamiya an maggwire-aara wá, a naba magateraa ngurna, a vaterte jirire ba dey á kya erva an Yaisu Almasiihu na a lyaterse am haypa na. ²⁵ Dadaamiya wá, nane a tsaá Yaisu Almasiihu, geni á ya shifa-aara ba seke sadake, daaci Dadaamiya á baraterá haypa-aha-aatare an uzhe á Egdze-aara nanna ge emnde a fetarfe bademme. A magaa una nanna ge maraterá jirire-aara ge emnde. Werre wá, a magaa ba seke diyaaka haypa á emnde, ndza á fá ba ervaunǵe. ²⁶ Amá kina wá, a wayte maraterán ge emnde geni nane wá, edda á jirire, á kátá nja á ba áte jirire-aara nanna, á kátá vaterte jirire-aara nanna ge emnde na tá anǵkwa fetaare áte Yaisu na keni.

²⁷ Má gevge estuwa, anǵkwa dalila á gálá ire á miya emtu mazle-aara? Baaka dekiǵeki. Labára baaka? Adaba Dadaamiya vamiteka jirire á katafke-aara ádaba mi dábete *tawraitá, amá a vamite jirire ádaba famitarfe áte Yaisu *Almasiihu. ²⁸ Adaba diyamidiya geni emnde tá shá jirire áza Dadaamiya sey ma fartarfe áte Yaisu Almasiihu, tá taa shánka ádaba ta dábete tawraitá. ²⁹ Emtu, Dadaamiya nanna sey ba ge Yahudiya-aha palle, ge emnde umele wá, Dadaamiya-aatare-ka emtu? Una estuweka, itare keni Dadaamiya-aatare ba nane nanna.

³⁰ Adaba baaka Dadaamiya umele, sey ba palle. Má fartarfe Yahudiya-aha áte Yaisu Almasiihu á vaterteva jirire á katafke-aara. Ge emnde a jeba umele keni ba estuwa nanna; má fartarfe áte Yaisu Almasiihu wá, itare keni á vaterteva jirire á katafke-aara. ³¹ Emtu má n̄a ba: Dadaamiya á vaterte jirire ge emnde sey má fartarfe ate Yaisu Almasiihu wá, n̄a ganve tawraita ba seke duksa dey emtu? Estuweka d̄ekid̄eki. Baira n̄á an̄kwa njante tawraita.

4

Náwa ba seke estara Ibrahimia a shaa jirire áza Dadaamiya

¹ Dzamawamidzámá áte eggyemiya Ibrahimia, mi ba uwe kina áte n̄ane? Ndza a shaa uwe n̄ane áza Dadaamiya? ² Ma andze Ibrahimia shánsha jirire áza Dadaamiya ádaba shagerire á slera-aara wá, ma andze á gálá ire-aara átekwa. Amá n̄ane ndza shánka dalila á gálá ire-aara á katafke á Dadaamiya. ³ An̄kwa ta puwete ba estuwa am wakita á Dadaamiya, a bá n̄ane: Ibrahimia a fetaare áte Dadaamiya, daaci, ádaba ba fetarfire-aara n̄anna, Dadaamiya a vante jirire á katafke-aara. ⁴ Diyamidiya geni má ura an̄kwa á maga slera wá, duksa na tá de vanta am iga á slera n̄anna gafka dey mázle-aara, una n̄anna mbera-aara, zlayá-aara. ⁵ Una keni ba estuwa: Edda una má dzamaaka de shá jirire áza Dadaamiya á ba an shagerire á slera-aara, amá a fetaare á ba áte Dadaamiya, ge n̄ane wá, Dadaamiya á vanteva jirire ba dey. Adaba Dadaamiya wá,

á dzegwándzegwa vanteva jirire ge slehaypa.
⁶ *Dawuda keni ndza a ndahese elva áte edda una a shaa jirire ba dey á katafke á Dadaamiya, a bá ñane:

Edda-aara ñanna wá, gedetegeḁa.

⁷ Gedartegeḁa emnde na Dadaamiya a yateraare emtaṅkire-aatare, á zhareka haypa-aha-aatare na.

⁸ Gedetegeḁa zhele na má Yaakadada Dadaamiya á jaheka haypa-aha-aara na.

⁹ Geḁa ñanna á tsakaná Dawuda na wá, sey tá sháná ba emnde na tá am shedekwe emtu? Una estuweka, antara ba emnde na tá baaka am shedekwe keni baḁemme. Adaba a bá miya ba kina: Dadaamiya a vante jirire ge Ibrahimia adaba a fetaare áte ñane. ¹⁰ Emtu Ibrahimia ndza a shanaa am sarte-ara geva edda á jirire á katafke á Dadaamiya? Am sarte na demda am shedekwe emtu, kwaye am sarte na zlaḁe daaka am shedekwe he? Ábi kwaye am sarte na zlaḁe daaka am shedekwe ba ḁekideki. ¹¹ Dem shedekwe na ndza a maganaa Ibrahimia wá, ndza ba nalaama ge marese fetarfire-aara áte Dadaamiya, antara jirire na a shanaa ñane am zuṅṅwire á katafke-aara na. Daaci Ibrahimia a geva estuwa dada arge emnde na daremka am shedekwe, amá fartarfe na. Dadaamiya á vaterte jirire á katafke-aara keni, ba seke una ni ndza a vante ge Ibrahimia werre na. ¹² Zlaḁe ádaliye keni ba ñane una dada arge emnde na tá am shedekwe, amá tá aṅkwa ḁaba fetarfire á eddemiya Ibrahimia na, ñane a fetaare kwaye zlaḁe daaka dem shedekwe na.

Sha duksa á Dadaamiya an fetarfire

¹³ Werre wá, Dadaamiya ndza a maganaa *waada ge Ibrahimia, antara wulfe-aha-aara, geni watse á de vaterte duniya bademme ba seke warita. Dadaamiya maganá nka waada nanna ge Ibrahimia á daba a dabete *tawraitá, amá á daba nane fetarfe áte nane haa a ganve edda á jirire á katafke-aara. ¹⁴ Ma andze Dadaamiya a magateraa waada nanna ba ge emnde na ta tsaahé áte tawraitá wá, ma andze baaka nampire á fetarfire, antara ba waada na a maganaa Dadaamiya na keni ma andze á gevá ba dey. ¹⁵ Ya ndahanaa á daba uwe una: á daba tawraitá wá, nane á maramiya ba ni ervaunde jaaja Dadaamiya áte emnde, á daba faransárka. Baira am tate na emnde diyarka tawraitá defikideki na wá, tá dzegwanka maganá baakire á fesarfire, á daba baaka ahuwa.

¹⁶ Daaci estuwa, *waada na a maganaa Dadaamiya na wá, a magán ge fetarfire, geni bademme á wulfe-aha á Ibrahimia tá de shá duksa nanna názá ba dey. Amaana: emnde a fetarfe na ta tsaá á ba áte tawraitá na, antara emnde umele na itare tá ankwá daba fetarfire á Ibrahimia na keni, bademme tá de shansha á ba an jirire. Á daba Ibrahimia wá, nane gevge eddemiya bademme. ¹⁷ Ankwá an puwa am wakita á Dadaamiya ba estuwa, a ba Dadaamiya á elván ge Ibrahimia wá: Yá gakvege dada arge emnde a jeba-aha gergere ba kwakya á bina. Daaci Ibrahimia a geva estuwa eddemiya bademmire á miya á katafke á Dadaamiya, á daba a fetaare áte nane. Ba Dadaamiya una edda á tsante ura am

fáyá, antara edda á ganve duksa na ndza baaka ðekideki na keni á ba an elva na á segashe am mbuwe-aara na.

¹⁸ Ibrahimá wá, ndza gulanaaka ñane fetarfire-aara ðekideki. Ma ndza emnde umele ta dzamán ba seke *waada á Dadaamiya á de gevka mazle-aara keni, Ibrahimá gulanaaka ñane fetarfire antara tama-aara ðekideki. A gevaa estuwa dada arge emnde a jeba-aha gergere kwakya ba seke una ni ndza a bannaa Dadaamiya, a ba ñane: Náwa watse egdzara á ña tá de kwakyefkwakye na. ¹⁹ Am sarte ñanna, iva á Ibrahimá á maga deremke. Ma Ibrahimá á zhara ire-aara gevge emgyegwe kurcumme, diyaadiya geni mukse-aara Saraatu á taa yeka egdzere mázle-aara keni, aley Ibrahimá gulanaaka fetarfire-aara ðekideki áte názena a bannaa Dadaamiya. ²⁰ Ñane ndza diyaadiya geni ba jirire, watse á shánsha duksa na a ba Dadaamiya á de vanteva na. Ñane magaaka shaige-aara ðekideki. Baira fetarfire-aara ñanna a vante ndzedá kwakya, á gálá ba Dadaamiya duksa-aara. ²¹ Ñane ndza njantenja am ervaunje-aara geni Dadaamiya an hákuma ge mága názena a maganaa waada-aara na. ²² Kwaye ñane dalila na ni Dadaamiya a vante jirire á katafke-aara ge Ibrahimá.

²³ Iyau, elva ñanna keni puwartepuwe am wakita á Dadaamiya, geni Dadaamiya ganvege edda á jirire ákyiye na mu, a halavuwa á ba áte ñane palle emtu? ²⁴ Elva ñanna wá, ta puwete áfaba miya keni, mi emnde na famitarfe áte edda una ndza a tsante Yaakadada Yaisu

am fáya, geni miya keni watse á vamiteva jirire á katafke-aara. ²⁵ Nane a naba tsanaahe ge Dadaamiya, geni á emtsemtsa ácfaba haypa-aha á miya. Am iga á emtsa-aara maa, a tsantehe zlaɓe ádaliye am faya, geni á vamite an una ɲanna ge miya keni jirire á katafke-aara.

5

Shamiyánsha mela antara Dadaamiya

¹ Daaci am shamiyánsha jirire á katafke á Dadaamiya, adaba barka á fetarfire á miya áte Yaakadada á miya Yaisu *Almasiihu, melamimela antara Dadaamiya mazle-aara. ² Ba Yaisu ɲanna palle una a weramitaa baráma geni mi shansha ɲgurna áza Dadaamiya adaba famitárfé áte ɲane. Kina wá, tsamiyaatse áte ɲgurna á Dadaamiya, gedamitegeda jipu, adaba anƙwa tama á miya ge de nja antara Dadaamiya am sleksire-aara. ³ Gedá á miya zlaɓe tsaaka áte una ɲanna palle. Una ma anƙwa zladá áte miya keni, gedá á miya ba kela-aara, adaba diyamidiya geni zladá ɲanna á mbamise farvaunƙe. ⁴ Má shamiyánsha farvaunƙe, am iga-aara mí de gevege emnde na hyarephyé am duksa bademme. Má gamiyevge estuwa, daaci má á ba an tama áte duksa á Dadaamiya. ⁵ Tama á miya ɲanna wá, á tekamika defekideki, adaba Shedekwe Cufedfe anƙwa á ndahamindaha am ervaunƙe geni Dadaamiya á wayámiwaya kwakya.

⁶ Ge jirire wá, werre ndza baaka dabari á miya defekideki. Daaci am iga á una ɲanna, de

hyephye sarte na ndza a tsanaa Dadaamiya na, lauktu a naba tsekwehe ge Yaisu *Almasiihu a emtsehe adaba haypa-aha á emnde-bademme. ⁷ Zlazladá jipu geni ura á emtsa am kela á ura umele, una ma edda-aara dabetedaba jirire bademme keni. Má edda una kwakya maggwire-aara áte emnde wá, ámbane ura umele á naba eksaarekse emtsa am kela-aara. ⁸ Amá Yaisu Almasiihu nane a naba emtsehe am kela á miya, kwaye zlahe ma emnde a haypa emtsaade. Daaci mi naba diyeddiye áte una nanna geni Dadaamiya wayamiwaya ba kwakya. ⁹ Adaba emtsamtsa Yaisu Almasiihu am kela á miya wá, daaci mi shaa jirire áza Dadaamiya an uzhe-aara. Kina wá, njamitenja áte jirire-aara, geni watse á de lyamiyalye am názena watse á de magaterta Dadaamiya ge emnde adaba tá an kwa jána an ervaunde. ¹⁰ Werre wá, ndza mi kelaade-aha á Dadaamiya, amá kina wá, baaka duksa am dagave á miya antara nane mázla-aara, zlanaa-zle an emtsa á Egdza-aara. Sakwa kina deme melamimela na wá, njamitenja áte jirire-aara keni geni á de lyamilya ba ge d'ekideki, adaba tsettse Egdza-aara am fáyá. ¹¹ Aley keni zlahe á tsaaka an una gedfa á miya: Gedfamitegedfa jipu áte Dadaamiya adaba názena a magaminaa nane á kya erva an Yaakadada á miya Yaisu Almasiihu, shamiyánsha mela antara nane kina.

*Názu ndza a sanaa Naadama, antara una a sanaa Yaisu *Almasiihu*

¹² Ndza adaba ba haypa á ura palle una samsa haypa á sem duniya, haypa nanna a sateraa emtsa ge emnde. Daaci a hyete estuwa emtsa áte

emnde bademme, adaba emnde keni bademme tá maga ba haypa. ¹³ Ndza ba lauktu Dadaamiya á tsekwaná *tawraitá ge nabi Muusa keni, kerten ndza njánja tsuwe haypa am duniya bademme. Amá am zamáne na ndza zlafe baaka tawraitá, Dadaamiya keni ndza ndavaaka haypa-aha á emnde. ¹⁴ Aley keni wá, kwaye am zamáne á Naadama, sem zamáne á Muusa, emtsa á maga ba sleksire-aara áte emnde bademme. Ma hyepka haypa-aha-aatare ba seke názá Naadama na a kwaleve cena elva á Dadaamiya na keni, emtsa wá, yaterka dekideki.

Nja á Naadama wá, ba gáráva á zhele na ndza a sáwa am iga-aara na. ¹⁵ Amá wá, zala buwa nanna ta gergere jipu. Haypa na ndza a ganaa Naadama wá, náza slanveka dekideki ge yaikkire á ngurna na a velanaa Dadaamiya á sáwa ba dey na. Ba jirire, adaba ba haypa á ura palle una emnde bademme sharánsha emtsa, amá jatermeká duksa an yaikkire á ngurna na á magaterná Dadaamiya ba dey ge emnde bademme. Una keni a maganaa á ba á kya erva an ura palle zlafe adaliye: Ura nanna Yaisu *Almasiihu. ¹⁶ Duksa na á vantá Dadaamiya ge ura wá, námpire-aara keni ba tsekemme, ká slateraaka antara una ndza a sanaa haypa á ura palle na. Názena a sanaa haypa á ura palle na wá, a saa ba záwa á sem mbiye á emnde bademme á katafke á Dadaamiya. Amá má Dadaamiya magateránmaga ngurna-aara ge emnde wá, ma a kwakyaave estara haypa-aatare keni, nane vaterteva jirire á katafke-aara geni a mbedateraaka shairiya. ¹⁷ Ge jirire wá, adaba

ba haypa á ura palle, emnde bademme daremde am erva á emtsa. Una bademme ba lámare á ura palle ñanna. Amá ura ge buwire, amaana: Yaisu Almasiihu, ñane a naba se magaa pute umele. Adfaba barka-aara emnde sharánsha ñgurna yaikke áza Dadaamiya, á vaterteva jirire ba dey á katafke-aara. Itare wá, watse tá dem sha sleksire an shifa na á zleka na.

¹⁸ Daaci ba seke una emnde bademme daremda am zává á katafke á Dadaamiya áfaba haypa á ura palle na wá, ba estuwa zlafe ádaliye una keni: Adfaba jirire na a maganaa ura palle, ura ñanna Yaisu Almasiihu, emnde bademme sharánsha effeya, a halaterse am zává, a vaterte shifa. ¹⁹ Zlafe ádaliye: Ba seke una emnde bademme daremda am erva ge haypa áfaba ura palle kwalevkwale cena elva á Dadaamiya na wá, ba estuwa zlafe ádaliye una keni: Dadaamiya á vaterteva jirire ge emnde bademme áfaba fesarfire á ura ge buwire na.

²⁰ Amá Dadaamiya a naba saa *tawraita zlafe ádaliye á sem duniya, geni á se kwakyepkwakya haypa-aha á emnde. Má kwakya haypa á emnde, Dadaamiya keni á magaterá ñgurna kwakya.

²¹ Ba seke una ndza a maganaa haypa sleksire-aara áte emnde bademme, á cebaterá an emtsa na wá, ñgurna á Dadaamiya keni an hákuma jipu zlafe ádaliye ge vaterta jirire ge emnde. Dadaamiya á kátá daterá á dem tata á shifa na á zleka na. Amaana tá de shá sleksire á kya erva an Yaakadada á miya Yaisu Almasiihu.

Má an emtsa áza haypa, amá má an shifa áza Yaisu

¹ Mí bá uwe kina áte jeba á elva ñanna? Mí bánba kina ganakini naba magawamimága haypa á miya, geni Dadaamiya keni á de sagamiyanvesage ñgurna-aara emtu?

² Estuweka ðekideki. Má ge elva á haypa wá, miya má an emtsa. Daaci mí dzegwáná estara kena mága haypa mázle-aara? ³ Emtu diyakurka geni miya baðemmire á miya, am sarte na tá aŋkwa baramibara am yáwe á baptisma na, miya gamiyevge palle antara Yaisu *Almasiihu emtu? Diyakurka geni am sarte ñanna ba seke emtsamimtsa kerðe antara ñane emtu? ⁴ An bára á miya am yawe á baptisma na wá, emtsamimtsa kerðe antara ñane, heðaramiheda kerðe keni. Daaci ba seke una ndza tsetetse Yaisu Almasiihu am fáya an hákuma á Eddenjara na, ba estuwa shifa á miya keni á eptsaptepts, gamiyevge aŋwaslire am njá á miya baðemme.

⁵ Daaci má gamiyevge palle antara ñane estuwa, an emtsa na ba seke názá-aara na, daaci ba jirire, ge tse am fáya keni ma ba palle. Dadaamiya á tsamitetse am fáya ba seke una ndza a tsantaa ñane. ⁶ Diyawamiyeddiye una ba shagera: Am sarte na tá aŋkwa zleŋela Yaisu Almasiihu áte dzaŋgala, cebarateraaceba kerðe antara shifa a haypire á miya werre na, geni shifa a haypire ñanna á zlauzle, mí sesse am erva á haypa mázle-aara. ⁷ Adaba má ura gevge emtsa wá, baaka názu á eksaná haypa áte edda-aara mázle-aara. ⁸ Má diyamidiya ge

emtsamimtsa kerde antara nane wá, ge tsete am fáya keni diyamidiya geni mi de tsettse antara nane. ⁹ Zlabe ádaliye: diyamidiya geni Yaisu Almasiihu wá, nane tsetse am fáya, á emtseka mázle-aara, adaba á danuka emtsa ge nane. ¹⁰ Adaba emtsa-aara nanna wá, ndza a emtsa adaba haypa-aha á emnde, a emtsehe ba ser palle, hyephye ge bademme. Amá shifa na an nane kina na wá, atuge Dadaamiya. ¹¹ Ba duksa palle ge kure keni: Diyaweddiye ba shagera am ire á kure, geni kure wá, kwá an emtsa á katafke á haypa. Amá shifa na kwá an nane kina na wá, kwá átuge Dadaamiya, adaba kwa ba palle antara Yaisu Almasiihu.

¹² Daaci yawanánka baráma dekideki ge haypa á maga sleksire-aara áte kure, geni sey kwá maga ba shagerkire na á kátáná vuwa á kure na watse á de ba am haha na. ¹³ Yawanánka ba kure an ire á kure vuwa á kure ge haypa, geni ubiya-aha á kure á gevge kazlaja á mága emtaŋkire. Arge una nanna, fawanemfa ire á kure am erva ge Dadaamiya, kwa emnde na ndza kwá an emtsa, tsakuretse am fáya na, geni bademme á ubiya-aha á kure, á gevge kazlaja á mága slera á jirire. ¹⁴ Daaci fawanemka ire á kure am erva ge haypa ba dey, adaba kure gakurevka am erva á *tawraitá, kure kwa emnde na kwá áte ngurna á Dadaamiya.

Geva náve á haypa, bi sha jirire áza Dadaamiya

¹⁵ Ázara á bá kure kina? Mí bánba ganakini miya mi baaka am erva á *tawraitá, má

áte ngurna á Dadaamiya, naba magaumimága haypa á miya emtu? Estuweka d'ekid'eki. ¹⁶ Emtu diyakurka geni má kwa yanaa ba kure ire á kure am erva á ura geni kwá d'aba ba n'ázá-aara, kure gakurevge náve-aha á edda-aara emtu? Ndza diyakurka estuwa emtu? Daaci má kwa nave-aha á haypa, kwá d'aba ba n'ázá á haypa, amá n'ane á d'akurá á de cebakurceba. Amá má kwá d'aba n'ázá á Dadaamiya, n'ane wá, á de gakurvege emnde a jirire á katafke-aara. ¹⁷ Galaumigála Dadaamiya á d'aba sakuresse am n'avire á haypa, kwá an'kwa fansárfe ge Dadaamiya, kwá an'kwa lyiya názu tá tsahakurse áte n'ane an'ervaunde á kure palle. ¹⁸ Kina wá, sakuresse am erva á haypa, gakurevge náve-aha á Dadaamiya geni kwá maga ba jirire mázle-aara. ¹⁹ Yá an'kwa vakurte gera á elva an' n'avire am duniya na wá, á d'aba ba yiyiyire á hyema á kure ge cenva elva áte watsewatsire. Werre, kure ndza kwa yaa ire á kure bademme ge mága ba shagerkire, ba kelaazare ndza kwa fare ba ge mága emtan'kire. Una keni magaumága á ba áte una n'anna: Yawanán'ya ire á kure bademme ge Dadaamiya, gawuvge náve-aha-aara ge mága ba jirire bademme. Estuwa, kwá n'inja áte cuded'dire.

²⁰ Am sarte na ndza zla'be kwá am n'avire á haypa, kure ndza baaka lámbe á kure áte elva á mága jirire. ²¹ Ndza kwa shaa uwe am mága á kure werre n'anna, kina ba enndaha-aara keni á wakurwa zherwe na? Ábi ndza baaka? Baira ma andze kwá shánsha emtsa am iga á una n'anna. ²² Amá kina wá, sakuresse

am erva á haypa ṅanna mázle-aara, gakurevge náve-aha á Dadaamiya. Námpire-aara keni shakuránsha jipu, gakurevge emnde cufedfde kwá átuge Dadaamiya. Am iga á una ṅanna keni, watse kwá shá shifa na á zleka na. ²³ Ádfaba má ura á maga ba haypa wá, edda-aara á de shá ba emtsa ge mbera-aara. Amá názu á vanta Dadaamiya ba dey ge ura wá, á vanta shifa na á zleka na, má garevge palle antara Yaakadada á miya Yaisu *Almasiihu.

7

Gáráva an mukse á zhele

¹ Ge diyakurkire emtu egdzar mama-aha-aaruwa geni *tawraitá anḱwa á maga hákuma-aara áte ura sey má zlaḱe edda-aara an shifa? Una elva-aaruwa una yá vakurte ge kure adaba kure diyakurdiya názu am tawraitá. ² Ba seke mukse á zhele, má zlaḱe zhele á mukse ṅanna an shifa, an piya jipu geni á verṅa mukse ṅanna ge de ga zhele umele. Amá má baaka zhele-aara an shifa wá, daaci á kwaráná ba ṅane ire-aara mázle-aara, á piyanteka tawraitá mázle-aara. ³ Má gevge ni zlaazlálá mukse ṅanna, de gaaga zhele umele a ya ba zhele-aara an shifa wá, mukse ṅanna maganaamaga gwardzire. Amá má keḱaakedá zhele-aara, ma de gaaga zhele umele keni, baaka gwardzire áte ṅane, an piyeka mázle-aara.

⁴ Ge kure keni ba estuwa ṅanna egdzar mama-aha-aaruwa, á kwarakurá tawraitá-ka mázle-aara, ádfaba kwá an emtsa á katafke-aara, emtsakuremtsa kerde antara Yaisu *Almasiihu.

Daaci kina wá, gakurevge átuge edda una ɲanna ndza emtsamta, tsetetse am fáya na. Miya bademme keni am njá á miya kina antara kure na wá, mí maga ba duksa shagera na watse an námpire aza Dadaamiya na. ⁵ Áɗaba am sarte na ndza mi maga ba názena á katáná ire á miya wá, ndza mi maga ba haypa. Sámsa tawraitá keni a se tsante enkale á miya zlaɓe ádaliye ge mága ba haypa. Estuwa, ma andze mi shánsha emtsa am iga-aara. ⁶ Ndza werre wá, mi ba seke danɗay-aha á tawraitá, amá kina shamiyánsha ire á miya ázeɲara. Áɗaba miya má an emtsa á katafke-aara. Daaci kina wá, mí an shifa áɲwaslire, mi dzegwándzegwa magannaamaga duksa ge Dadaamiya áte uɲɲule na á maramiyá Shedefke-aara na. Gafka áte uɲɲule werre na ndza á yanaa názu am tawraitá na.

**Tawraitá á maraterá ba haypa-aha-aatare ge emnde*

⁷ Mi bá uwe kina áte jeba á elva na? Mí banba ganakini an haypa *tawraitá emtu? Estuweka ɗekidɗeki. Aley keni wá, a se ɓalisaa ba tawraitá názena tá ɗahaná an haypa na. Ma andze biyánka shairiya á Dadaamiya: Fe-ka ice am duksa á ura, ma andze yá diseka geni una ɲanna haypa. ⁸ Amá ba de diyaneddiye shairiya á Dadaamiya ɲanna, haypa shánsha baráma áte iya mázle-aara, berhiyemberha am fa ice am duksa-aha gergere ba kwakya. Ma andze ɓaaka tawraitá, haypa keni ma á dzegwánka mága kelaadire áte ura. ⁹ Werre, am sarte na ndza zlaɓe diyanka tawraitá wá, ndza ya kurken

ya ba ura an shifa. Amá ba de diyaneddiye shairiya á Dadaamiya wá, náwa ya keni, á bá haypa, tsetse an shifa, ¹⁰ iya emtsanemtsa. Dadaamiya wá, ñane a saa tawraita ge vaterte shifa ge emnde, amá áte názá-aaruwa na wá, a siyaa ba emtsa. ¹¹ Ya ndahanaa ádfaba uwe una? Ádfaba am sarte na diyaneddiye shairiya á Dadaamiya, haypa keni shánsha baráma áte iya, a jiyaa enkale-aaruwa bademme geni yá farfe ge mága haypa-aha umele. A jiyaa estuwa haypa, amá a ñgudansaa ba tawraita huđe. ¹² Amá tawraita an ire-aara wá, ñane cufedde, shairiya-aha á Dadaamiya na am huđe-aara bademme cufedde, bademme ba jirire, bademme shagera.

¹³ Daaci duksa shagera estuwa emtu á siya emtsa ge iya? Ñane-ka dekideki. Iya wá, a jiyaa ba haypa. Ba ádfaba dzegwanánka dfaba shagerire á názena am tawraita, daaci a naba cavaditehe ge haypa, a tedese shifa am ya, an duksa shagera ñanna. Tá dise áte una ñanna ganakini haypa wá, haypa ba jire. Daaci, adaba barka ba tawraita, haypa maresemáre ire-aara geni ñane wá, mándzawe ba jire.

Ura á kátá á maga shagerire, amá á daaka ndzedá-aara

¹⁴ Diyamidiya *tawraita wá, a sawa áza Dadaamiya, amá iya, ya ba urimagwe, ba seke tá veliwe an vela ge haypa, ganevge náve-aara. ¹⁵ Názena yá maganá iya na wá, ba iya keni cenanseka. Názena yá kátá maganá iya, á daaka ndzedá-aaruwa, yá maga una wayanka

na. ¹⁶ Má ganuge názu wayanka emmága-aara wá, yá dise áte una ñanna shagerire á tawraitá. ¹⁷ Daaci má estuwa, mándzawire ñanna yá maganá ba iya an ire-aaruwa-ka, á maganá ba haypa na ankwá am vuwa-aaruwa na. ¹⁸ Diyandiya ganakini baaka shagerire azeruwa, amaana: ázeruwa urimagwe na. Ádaba ba jirire geni am ervaunđe-aaruwa wayanwáyá mága shagerire, amá á daaka ndzedá-aaruwa. ¹⁹ Shagerire na yá kátá maganá ya wá, á daaka ndzedá-aaruwa, yá maga ba mándzawire na wayanka na am kela-aara. ²⁰ Má ganuge názu wayanka emmága-aara na wá, yá dise áte una ñanna geni yá maganá ba iya an ire-aaruwa-ka, á maganá ba haypa na ankwá am vuwa-aaruwa na. ²¹ Názu yá ankwá tapaná iya am vuwa-aaruwa wá, má yá kátá maga shagerire, kerten ba jarje shagerkire á katafke-aaruwa, yá maganaamaga una ñanna am kela-aara. ²² Ate una am ervaunđe-aaruwa wá, wayanwáyá yá dabetedába tawraitá á Dadaamiya ba shagera. ²³ Amá ankwá duksa mándzawe am vuwa-aaruwa, ñane wayiyanteka dēkideki ganakini yá maganaamaga shagerire na diyandiya am ire-aaruwa. Duksa ñanna a give ba seke yá náve-aara geni sey yá maga ba haypa na am vuwa-aaruwa na, baaka duksa umele. ²⁴ Kay! yá baaka degiya! An vuwa á haypire-aaruwa na wá, á shisha emtsa! Á lyisá ware-aaruwa? ²⁵ Dadaamiya wá, ankwá, yá slafaná we-aaruwa ba ge ñane palle á kyá erva an Yaakadada á miya Yaisu *Almasiihu.

Daaci ba seke una ya enndaha na: Iya an ire-aaruwa wá, tsanaatse á ba áte una a ndahesa Dadaamiya am tawraita na. Amá an vuwa a urimagwire-aaruwa na wá, yá aṅkwa maganá áte názá á haypa.

8

Emnde na tá maga ba názu á kataná Shedekwe Cufedde na

¹ Daaci kina wá, baaka záwá mazla-aara am mbiye á emnde na garevge palle antara Yaisu *Almasihu na. ² Adaba Shedekwe Cufedde na aṅkwa vaterte shifa ge emnde na tá am erva á Yaisu Almasihu, sisese am erva á haypa, sisese am erva á emtsa. ³ *Tawraita wá, ṅane dzegwánka halese emnde am erva á haypa, adaba baakire á payda á emndimagwaha ge mága názu a ndavateruwa ṅane. Amá wa, Dadaamiya maganaamaga duksa ṅanna jan-viyaaja ge tawraita na. A maganaa estara ṅane? A naba bela Egdza-aara á sem duniya, áte nderáva á miya emndimagwaha na má an haypa na, geni á se lyamivaare ṅane haypa-aha á miya. Dadaamiya a puwanem estuwa zawa am mbiye ge haypa na am vuwa á emnde na. ⁴ Dadaamiya a magaa una ṅanna wá, ba geni mí maṅka názena á kataná ba ire á miya, amá mí maganaamaga jirire na á ndavaná tawraita na bademme, miya emnde na á kwaramiya Shedekwe Cufedde na. ⁵ Adaba emnde na tá maga ba názena á kataná ire-aatare na wá, itare tá dzama ba názena á kataná ire-aatare ṅanna. Emnde na tá maga ba názena a baterna

Shedekwe Cudedde, itare tá dzama ba názena á kataná Shedekwe Cudedde na. ⁶ Daaci emnde na itare tá maga ba názu á kataná ire-aatare, itare tá shánsha emtsa. Amá emnde na tá dzáma ba názu á kataná Shedekwe Cudedde, itare tá shá shifa na á zleka na, antara hairire. ⁷ Emnde na ni tá dzama ba názena á kataná ire-aatare na wá, itare tá dabeka tawraitá á Dadaamiya, itare tá dzegwánka dabá Dadaamiya dekideki, ta kelaade-aha-aara. ⁸ Bademme á emnde na tá njá á maga ba názena á kataná ire-aatare na wá, itare tá shánka háyá áza Dadaamiya dekideki.

⁹ Amá kure wá, kwá maganá áte una á kataná ire á kureka, á kwarakurá ba Shedekwe Cudedde, adaba ankwá Shedekwe nanna am kure. Má ura baaka an Shedekwe nanna wá, edda-aara gevka átuge Yaisu Almasiihu. ¹⁰ Ma kwa an emtsa adaba lámare á haypa keni, amá má ankwá Yaisu Almasiihu am kure wá, Shedekwe Cudedde á vakureteva shifa jirire, adaba kure gakurevge emnde a jirire á katafke á Dadaamiya. ¹¹ Má ankwá Shedekwe á Dadaamiya na ndza a tsetaa Yaisu Almasiihu am faya na am kure wá, una ba jirire ganakini ba nane zabe una watse á de femfa shifa am kure keni, an hákuma á Shedekwe-aara ankwá am kure na.

¹² Daaci, egdzar mama-aha-aaruwa, má es-tuwa wá, ba seke má an gema am vuwa geni sey mi maganaamaga názena á kataná Shedekwe Cudedde na, mi manka una á kataná ba ire á miya na. ¹³ Adaba uwe, má kwá dabaná áte una á kataná ire á kure na, kure kwá de shá ba emtsa. Amá má kwá ganapteka dekideki

ge kazlaŋa-aha na á kataná vuwa á kure, á kwarakurá ba Shedekwe Cudedde, daaci estuwa wá, kwá shánsha shifa á jirire. ¹⁴ Bademme á emnde na tá dabaná áte una á maraterná Shedekwe Cudedde na wá, itare ta egdzara á Dadaamiya. ¹⁵ Adaba uwe, Shedekwe Cudedde na kwa shanaa kure áza Dadaamiya na, kwa shan geni á eptsakurá adaliye á dem návire á kure werre-ka, geni kwá njá an lyawa zlaŋe adaliye-ka, amá kwa shan geni á gakurvege egdzara á Dadaamiya, á vamita nane baráma a dáhá Dadaamiya an dada. ¹⁶ Iyau, anƙwa á bamiyanba Shedekwe Cudedde nanna am ervaunƙe á miya, geni miya wá, ba jirire ma ba egdzara á Dadaamiya. ¹⁷ Am gamiyevge egdzara-aara estuwa, daaci miya keni má de shánsha dza á miya am duksa shagera na a fater ge emnde-aara na. Ba miya antara Yaisu Almasiihu una má de shánsha duksa nanna. Adaba má eksamiyaarekse sha zlaƙa seke nane, daaci má shánsha de nja am yaikkire keni antara nane.

Yaikkire na má ufaná miya áza Dadaamiya

¹⁸ Una wá, diyandiya ba jirire ganakini zlaƙa na má anƙwa shaná miya kina wá, hyafka ba názara keni ká slaterka an yaikkire na watse á de vamita Dadaamiya na. ¹⁹ Adaba bademme á duksa-aha na a nderanaa Dadaamiya, tá anƙwa á tsakwa ba hyema á sarte na má watse Dadaamiya á mara egdzara-aara áte parakkire am sleksire-aara na. ²⁰ Bademme á duksa-aha na a nderanaa Dadaamiya na wá, garevge ba seke

duksa ba dey ázeṅara. Amá namaari-aatare-ka, a fateraare ba Dadaamiya ṅanna adaba haypa á emnde. Aley, duksa-aha ṅanna tá á ba an tama-aatare áte shagerire na watse á de magaterná Dadaamiya. ²¹ Elva ṅanna wá, amaana: Bademme á duksa-aha na a nderanaa Dadaamiya na, watse tá shánsha ire-aatare. Adaba watse tá sesse am erva á emtsa, watse tá lebe-ka mázle-aara, itare keni watse tá shá yaikkire ba seke egdzara á Dadaamiya. ²² Miya wá, diyamidiya ganakini sem ba vatená keni, bademme á duksa-aha na a nderanaa Dadaamiya na tá aṅkwa basha ba zladá emtsaade. Am ervaunde-aatare tá aṅkwa ṅiya ba seke mukse na am zladá á yá na. ²³ Amá tá ṅiya ba duksa-aha ṅanna-ka palle, antara ba miya. Amá Dadaamiya vamiteva Shedekwe-aara. Shedekwe ṅanna wá, duksa zuṅṅwe am nazena mí de shaná miya ázeṅara bademme. Daaci mí ámbera á ba ṅiya ṅanna am ervaunde á miya, má aṅkwa tsákwa ba hyema á sarte na watse á se halamisehale Dadaamiya náza á ba ge dekideki am zladá ṅanna, á gamivege egdzara-aara. ²⁴ Dadaamiya wá, ṅane a lyamise vatene-ka, amá miya zlaḅe má aṅkwa tamaná á ba an tama emtsaade. Adaba uwe, má ura á nanna názu aṅkwa á tamaná ṅane wá, á tamaná an tameka mazla-aara adaba shansha. Emtu ware edda una zlaḅe á tamaná an tama duksa na am erva-aara ba ge ṅane? ²⁵ Tama wá, mi fánaa áte duksa na zlaḅe namiyánka emtsaade na. Una wá, mí tsakwa hyema-aara ba shagera, mí farvaunde ba shagera am huḅe-aara.

²⁶ Daaci estuwa, Shedekwe Cufedde keni á sáwá á se melamiyumele adaba baaka ndzedá á miya ge miya. Miya wá, ba mága maduwa áte unjule-aara keni diyamika, amá Shedekwe Cufedde á kyuwanva ba nane ge Dadaamiya am kela á miya, á nalamiyunale nane áte una á taa tsakeseka ura na. ²⁷ Dadaamiya wá, nane diyaadiya názu am ervaunđe á emnde. Daaci nane diyaadiya názena á kataná Shedekwe Cufedde na keni, adaba Shedekwe Cufedde nane á nlateru ba ge emnde á Dadaamiya, á nlateru áte namaari á Dadaamiya.

²⁸ Daaci má estuwa, diyamidiya ganakini Dadaamiya wá, anjwa antara emnde na a dzeratersaa nane ma am uwe keni. Itare keni wayarwáyá an Dadaamiya jipu. Ma jebara-aatare keni á zlauzle á ba áte shagerire. ²⁹ Emnde na Dadaamiya ndza a dzeraterse werre na wá, a ba am werrire nanna zlahe adaliye a tsateraahe ganakini watse tá de gáráva antara Egdza-aara, lauktu Egdza-aara á de geva makaji am dagave á egdzara nanna bademme. ³⁰ Bademme á emnde nanna á dzeratersa Dadaamiya werre na, a datersehe bademme, a vaterte jirire á katafke-aara, a naba vaterte nja antara nane am sleksire-aara.

Dadaamiya wayamiwaya baaka halavuwa-aara

³¹ Má Dadaamiya anjwa antara miya estuwa, anjwa názu mí ndahaná miya zlahe adaliye arge una nanna emtu? Ware edda una á dzegwándzegwa geva kelaade á miya mázla-aara? ³² Dadaamiya, nane shebaaka Egdza-aara,

amá a naba yananuhe ge emtsa áǎaba miya. Má Dadaamiya á vamite Egdza-aara estuwa, sakwa duksa-aha umele emtu? duksa-aha umele baǎemme keni watse á de vamiteva. ³³ Ware edda una á dzegwándzegwa icateraare sera ge emnde na a dzeraterse Dadaamiya? Baaka ǎekideki, áǎaba ba ǎane an ire-aara una a vaterte jirire na. ³⁴ Daaci estuwa, aǎkwa ura a dzegwándzegwa mbedamimbedá am shairiya emtu? Baaka á jerka ǎekideki. Adaba Yaisu *Almasiihu ǎane emtsamtsa áǎaba miya, zlabé ádaliye keni tsetetse am fáyá, aǎkwa am naǎafa á Dadaamiya, á ndahaná ǎane elva am kela á miya. ³⁵ Nja wayáva na á wayámiya Yaisu Almasiihu na, aǎkwa názu á dzegwándzegwa tegamiya an ǎane emtu? Baaka una á jerka ǎekideki. ǎane ba á wayamiwaya. Una ma palasa, ma beccire, ma zlaǎa na tá fáná emnde áte miya, ma waya am huǎe, ma petekkire á erva, ma nasáre na áte ura, una ma duksa na á zланаazle shifa am miya keni á dzegwánka ǎekideki. ³⁶ Zlaǎa á miya ge miya wá, ba seke una aǎkwa puwartepuwe am wakita á Dadaamiya na, a bá ǎane:

Áǎaba ba ekka Dadaamiya, ǎere ba kelá á váha ba seke tá zланаazle shifa am ǎere, ganǎerevge ba seke kyawe-aha na tá dáterá á de cebaterceba na áza emnde.

³⁷ Nja una-aha ǎanna baǎemme na, aley miya wá, má vaatara keni sey mi gana ba miya midalire, áǎaba ndzendzedfire á edda una wayamiwáyá jipu na. ³⁸ Una ba jirire diyandiya ganakini baaka ǎekideki duksa na

á dzegwándzegwa tegamiya antara Dadaamiya, ádfaba wáyava-aara kwakya jipu áte miya. Una ma má emtsa, ma má ba an shifa á miya layye keni ba duksa palle ázenjara. Ma malika-aha antara duksa-aha na am samaya na, ma duksa na anjwa a magava kina, ma una watse á de magava á katafke na, ³⁹ ma duksa-aha na tá am zhegela átire, ma una am ekte á samaya keni, am duksa-aha na a nderanaa Dadaamiya bademme á jerka dfekideki una á dzegwándzegwa tegamiya an Dadaamiya, áte wáyáva-aara na á wayámiya njane á kya erva an Yaisu Almasiihu na.

9

Iserayiila-aha jirire na a dzeratersaa Dadaamiya

¹ Náwa elva-aaruwa na yá bakurná ya, yá ndaakur ba jirire, baaka fida amkwa, adfaba ya sledfaba á Yaisu *Almasiihu. Ba iya keni an hakuma á Shedekwe Cufedfe, diyandiya am ire-aaruwa ganakini ba jirire baaka fida am elva-aaruwa njanna dfekideki. Yá bakurá geni ² yá áte paláse an tsaka ire, á wiwa jipu am ervaunde-aaruwa baaka ekhye-aara. ³ Á wiya adfaba uwe? Ádfaba emnde a jeba-aaruwa diyareka Yaisu Almasiihu ge njzla shifa-aatare. Ate iya kina wá, ma seke á naba gevge wá, wayan-wayá geni á nyainyivenyainye Dadaamiya am kela-aatare, á mariyánka dfaba Yaisu Almasiihu njanna mazla-aara, mákini itare tá shansha shifa

ba jirire. ⁴ Itare ta emnde a *Iserayiila, a dzeratersaa ba Dadaamiya, a gaterve egdzara-aara, ba Dadaamiya ṅanna a marateraa demdemire-aara ge itare, a magateraa namána, a vaterte *tawraitá, antara baráma á nja am sera-aara ba kelaazare, am magateraa *waada ganakini watse á de vaterte duksa; aley, itare eksaranteka dekideki. ⁵ Itare ta wulfe-aha á Ibrahimá tsa, am yá á vuwa, baira ta ba emnde a jeba antara Yaisu. Yaisu Almasiihu wá, ṅane Dadaamiya, duksa bademme á bá am erva-aara. Galaumigálá ba ṅane dem ba ge dekideki. *Aamin.

⁶ Dadaamiya eptsanteptsá elva-aara emtu? Una estuweka. Duksa na a ndahese Dadaamiya wá, baaka pekye-aara. Amá Iserayiila-aha kwakya diyarka Yaisu Almasiihu. Estuwa bademme-aatare-ka una garevge Iserayiila-aha á jirire. ⁷ Zlabe adaliye, Ibrahimá wá, kwakya wulfe-aha-aara, amá áte una ndza a ndahanaa Dadaamiya wá, bademme-aatare-ka ta wulfe-aha-aara ba jirire á katafke á Dadaamiya. Adaba a bá Dadaamiya á elvan ge Ibrahimá: Sey ba eggye-aha á Isiyaaku palle una ta wulfe-aha á ṅa ge ekka. ⁸ Elva ṅanna wá, amaana: Am wulfe-aha á Ibrahimá bademme, tá anṅwa emnde umele-aatare garevka egdzara á Dadaamiya. Sey ba emnde na Dadaamiya a maganaa waada-aara ge Ibrahimá emtsaade lauktu á shatersha na. ⁹ Náwa ndza a maganaa estuwa Dadaamiya waada ṅanna ge Ibrahimá: Ndza a banaa: Má watse hyephye sarte-aaruwa, watse yá sawa, Saraatu á de ya egdzere zhele.

¹⁰ Zlabe halavuka áte una ṅanna palle.

Raibaika keni ndza a yanaa egdzara wulhe-aha buwa ge eggyemiya Isiyaaku. ¹¹⁻¹² Á ba am una zlaɓe yaraterka emtsaade keni kerten mbedanumbede tsawe Dadaamiya ge Raibaika, ganakini watse á malaavemale ba kudere arge male, watse male na á de maganá slera ge kuderenjara. Baaka názu ta maganaa itare emtsaade, ma shagerkire ma shagerire keni. Dadaamiya a magaa una njanna ge marese ganakini ma vaatara keni njane á maga duksa á bá áte una á kataná njane. Daaci má á dzera ura keni, á eksese ura-aara á ba áte una á kataná njane, adaba slera á edda-aara-ka. ¹³ Daaci de sesse una njanna am wakita á Dadaamiya, a bá njane: Iya ya hayá ba Yakubu, wayanka an Isuwa.

¹⁴ Daaci, mí bá uwe kina áte jeba á elva na? Mí bánba ganakini baaka jirire á Dadaamiya emtu? Una keni estuweka dekideki. ¹⁵ Ábi ndza banánba Dadaamiya ge Muusa, a bá njane: Iya, yá diya ba magan shagerire ge edda una yá kata maganá shagerire na, yá diya ba zanvaareze ge edda una yá kata zanvaareze, á bina. ¹⁶ Daaci má Dadaamiya eksesekse ura wá, adaba a katanaa edda-aara-ka, adaba slera-aara-ka, amá a wayta ba Dadaamiya maganá shagerire ge edda-aara. ¹⁷ Zlaɓe adaliye, anjwa puwartepuwa am wakita á Dadaamiya, a bá Dadaamiya á elvan ge sleksu *Firawna: Ganakveka slekse yaikke ba dey, ya gakve slekse yaikke geni watse yá marese hakuma-aaruwa áte ka, yá hyanmehye zhera-aaruwa am duniya bademme an una njanna. ¹⁸ Kwaye njane

zláláva á elva ñanna, geni Dadaamiya á maganá shagerire ge edda una á kataná ñane, á vante degdegire á ire ge ura umele, bademme á magán á ba áte una á kataná ñane.

Shagerire na á magaterná Dadaamiya ge emnde, antara má jaaja ervaunđe

¹⁹ Ambane ura umele má cenáncena estuwa, á de biyá: Labára Dadaamiya á ñá emnde an shairiya adaba shagerkire na tá maganá itare má ba zlauzle á sawa ázenára? ²⁰ Ya bá ba ka ura-aaruwa: Ka urimagwe keni ká hyep uwe, baira ká gan jáwe ge Dadaamiya? Gahe keni á dzegwándzegwa maganá jáwe ge slendera-aara, á baná: ká nderi ge uwe estuwa emtu?

²¹ Slendera á gahe wá, á diya ba emmága názena á kataná ñane an ebbehye-aara. Á bá an ebbehye palle, á naba tegansetege buwa, á nderendera gahe na an daradza na an kyalma-aara, an umele keni á nderendera zhera ba gahe an ñane.

²² Daaci má Dadaamiya keni á kata magán ba seke náza slendera á gahe, á shákaashá emtu ge ekka? Náwa ñane, á kátá maraterá ervaunđe na á ja ñane na, antara kwakyire á hakuma-aara ge emnde. Aley keni wá, zlafe anjwa á ebbasha emtsaade emnde na a nderateraa ñane na, antara ba emtanjire na tá maganá itare na keni, ñane á faterá ba ervaunđe. Amá vacite umele wá, emnde ñanna tá de shá ba emtsa.

²³ Ba estuwa ñanna zlafe adaliye, Dadaamiya á kátá maraterá sleksire-aara ge emnde na a magateraa shagerire, a tsatsater kwaye am

fantaufe geni watse tá de njá kerde am sleksire-aara. ²⁴ Emnde ɲanna wá, ba miya, a dzeramisaa ɲane. A dzeramise á bá am Yahudiya-aha-ka palle, a dzerese am jeba-aha umele keni bademme. ²⁵ Una wá, ba seke una aɲkwa a ndahese am wakita-aara a puwetaa nabi Hausiya na, a bá ɲane:

Emnde na ndza ta emnde-aaruwa-ka na watse yá gatervege emnde-aaruwa; emnde a jeba na ndza wayanaterka na watse yá gatervege náwiyá-aha-aaruwa, a bá ɲane.

²⁶ Ba emnde ɲanna ndza ya baternaa ba iya am larde-aatare geni ta emnde-aaruwa-ka dekideki na, á bá am larde ɲanna watse yá bateránba zlaɓe ádaliye: Ekkure, kwa egdzara-aaruwa ge iya, ya Dadaamiya slefa shifa am emnde.

²⁷ Aɲkwa názu ndza a balesaa nabi Aisaya keni áte Iserayiila-aha, a ba ɲane: Ma Iserayiila-aha yaireya ba kwakya, garevge ba seke shiili na am guwa na keni, aley watse cekwa emnde na tá de ɲezlesenɓle na am dagave-aatare, a bá ɲane. ²⁸ Dadaamiya Yaakadada wá, á haraaka, watse á se emmága názena a ndahesaa ɲane na bademme.

²⁹ Una keni ndza a balesaa ba nabi Aisaya ɲanna zlaɓe ádaliye, a bá ɲane:

Dadaamiya wá, slekse ba ɲane palle. Ma andze dzereseke emnde umele am dagave á egdzara á miya wá, miya keni ma andze mi baaka ba seke tara ekse á *Saudauma antara *Gaumaura, ma andze miya keni á shamisha lámare ba seke itare.

*Yaisu *Almasiihu gevge ba seke nákwá á ceba emnde an ektápaare áza Yahudiya-aha*

³⁰ Estara ɲane zɲáláwa á elva ɲanna? Sera á elva ɲanna wá, náwa estuwa: Emnde a jeba umele itare tatayarka geva emnde a jirire am ice á Dadaamiya ɲekideki. Amá kina wá, ta geva ba itare emnde a jirire áza Dadaamiya, adaba fartarfe an ɲane. ³¹ Yahudiya-aha maa, itare ta tatayanaa á bá an ndzedá ge zla názena á ndahaná *tawraita, ge sha jirire an ɲane áza Dadaamiya, amá dáaka ndzedá-aatare. ³² Labára daaka ndzedá-aatare? Adaba fartareka am ervaunɲe. Itare tá slaslán ba seke watse tá shá jirire áza Dadaamiya, má watse zɲarnaazle mága názena á ndahaná tawraita bademme. Daaci a cebateraa estuwa nákwá ɲanna an ektápaare. ³³ Ankwá puwartepuwa am wakita á Dadaamiya, a bá ɲane:

Cenaucena bademme: Náwa yá belá nákwá palle am larde á *Siyauna, watse á de cebaná ɲane emnde an ektápaare, watse ɲane á geva palaha na tá mbaɲa emnde átekwa na. Amá edda una a fetaare áte ɲane wá, á haslanaaka.

10

¹ Egdzar mama-aha-aaruwa, názu yá kataná iya kwakya am ervaunɲe-aaruwa, yá ankwá ɲalaná áza Dadaamiya wá, yá kátá ba a saremsa Yahudiya-aha á ɲere keni á sem sera á Dadaamiya, tá lyelya shifa-aatare. ² Ge jirire wá, yá endáhá ba parakke itare keni tá ankwá wava ge mága názena á kataná Dadaamiya, amá

sharantauka ba emmága-aara. ³ Am sharantauka ge názena tá maganá emnde ge sha jirire an ñane aza Dadaamiya, itare ta naba njeta áte slera-aatare ge sha jirire. Daaci an una ñanna, itare sarka á sem sera á Dadaamiya ge sha jirire. ⁴ Am sarte na samsa Yaisu *Almasiihu, slera á *tawraita keni zlauzle mazle-aara. Estuwa, má á fetaare ware áte ñane keni edda á jirire ba ñane áza Dadaamiya.

*Ma á fetaare ware áte Yaisu *Almasiihu keni á lyelye shifa-aara*

⁵ Werre wá, ndza a puwetaa nabi Muusa áte elva á sha jirire áza Dadaamiya an názena am *tawraita, a bá ñane: Má ura maganaamaga názena am tawraita wá, á shansha shifa. Amá wá, a yanseka ba palle keni, á bina. ⁶ Amá á ba am wakita á Dadaamiya ñanna zlaɓe ádaliye, una tá puwete ge sha jirire áza Dadaamiya an fetarfire wá, estuweka. A bá ñane: Bánka am ervaunɗe á ña ganakini ware una watse á kapte á dem samaya na. Elva ñanna wá, amaana á kata bá: ware una á de ɗaha Yaisu *Almasiihu am samaya. ⁷ Zlaɓe ádaliye: Bánka am ervaunɗe á ña ganakini ware una á duwa á dem faya na. Amaana: a duwa ware á de ɗaha Yaisu Almasiihu na am faya. ⁸ Bánka estuwa, aɗaba a ba wakita á Dadaamiya wá: elva á Dadaamiya ba herzhe an ka, yiyiyeka ɗekideki. Elva ñanna wá, á ba am mbuwe á ña keni ndaksendahe, faktarefe am ervaunɗe á ña, a bina. Aɗaba elva umele-ka, ba elva na má anƙwa balaterá waazu-aara ge emnde geni

a fartarfe áte Dadaamiya na. ⁹ Má ndaksendahe an we á ña parakke ganakini ba Yaisu una Yaakadada, fakatarfe keni am ervaunđe á ña geni Dadaamiya tsantetse am faya wá, ekka ká ñezlesenjle. ¹⁰ Máki famitarefe áte Yaisu Almasiihu a ba an jirire, ira mí ndahaná an we á miya geni Yaisu Almasiihu wá, ñane Yaakadada, Dadaamiya á vamiteva jirire, á ñezlamisenjle. ¹¹ Ankwa á ndahaná wakita á Dadaamiya, a bá ñane: Ma a fetaare ware áte ñane keni, á tekanaaka, á bina. ¹² Una ñanna wá, a ndahanaa áte emnde bademme, ma Yahudiya-aha, ma emnde a jeba umele keni, Yaakadada-aatare ba palle, á magaterá shagerire ge emnde na tá ñala ázeñara na. ¹³ Adaba ankwa ta puwete ba estuwa am wakita á Dadaamiya, a bá ñane: Bademme á emnde na tá ñala Yaakadada na, tá ñezlesenjle.

¹⁴ Amá elva na wá, bibiya. Tá ñala estara ázeñara má fartarka áte ñane? Ge fetarfe keni, tá fetaara estara kena áte ñane má cenaránka labáre-aara? Ge cena-aara keni, tá cenána estara kena má de barateránka emnde umele? ¹⁵ Ge de ndaterndaha ñanna keni, tá de baterá estara kena má belarka emnde a bala waazu? Ba seke una ankwa ta puwete am wakita á Dadaamiya a bá ñane: Ankwa názu shagera seke sawa á emnde a bálá waazu á labáre á higahe, á bina. ¹⁶ Amá keni wá, ta cekwa emnde na lyarvaalya an ervaunđe-aatare palle labáre á higa ñanna, ba seke una a bantsa nabi Aisaya na. A ba ñane á elvan ge Yaakadada: Yaakadada-aaruwa, tá ankwa-he dème emnde na fartarfe

áte elva á ña na ña de balatersebále na, á bina. ¹⁷ Daaci diyaweddiye ba shagera ganakini, lauktu ura á fetarfe wá, á fetaare áte názena a cenanaa ñane am waazu. Má ura cenáncena waazu keni, á ba aṅkwa ura á balanse elva á Yaisu *Almasiihu.

¹⁸ Daaci mi bánba ganakini cenaaranka emnde a *Iserayiila waazu á labáre á higa ñanna emtu? Ba jirire cenaarancena. Am wakita á Dadaamiya keni aṅkwa an puwa, a bá ñane: Ma áme keni emnde ta cena ba kwara-aatare tá bálá elva á Dadaamiya, labáre-aatare hyemhye am duniya bademme. ¹⁹ Una ni ba jirire mi bánba ganakini emnde a Iserayiila diyarka labáre á higa emtu? Ba jirire diyardiya, amá liiyarka. Emtsaade wá, ndza a bánba nabi Muusa werre, geni a bantsa Dadaamiya:

Aṅkwa názu watse yá maganá ya, kwá de kuma shagerire á njá á emnde na ndza hyarefka ba názara keni na, watse á mbertembera ervaunǵe á kure ba seke kára, adaba itare ta emnde na ndza baaka enkale-aatare na, á bina.

²⁰ Am iga á una ñanna, nabi Aisaya keni shebaaka d'ekideki, a ndaha zlaɓe adaliye geni a bántsa Dadaamiya:

Emnde na ndza tatayarika na wá, sharisha, ya marateraa ire-aaruwa ba ge emnde na ndavarika d'ekideki na, a bá ñane.

²¹ Amá a ba ñane áte emnde a Iserayiila wá:

Váha deppe yá aṅkwa maraterá erva-aha-aaruwa geni yá d'aháterá ásezerwa, amá

kwalariyarkwale, ta magiya degdegire á ire.

11

*Dadaamiya yanka emnde a *Iserayiila*

¹ Daaci má estuwa wá, anƙwa ndava-aaruwa zlaɓe ádaliye. Una á bánba ganakini Dadaamiya á yateraaya emnde-aara ɲanna emtu? Yateraaka ɗekiɗeki. Adaba ba iya an ire-aaruwa keni, ya ba ura *Iserayiila ɲanna miyenne, ɲa emnde a jeba palle antara emnde á Bainjamain, ya ba wulfe á Ibrahimia miyenne. ² Dadaamiya yateraaka emnde-aara na á dzeraterse kwáye am fantaufe á duksa baɗemme na. Caamane ábí diyakurdiya názena a ndasaa wakita á Dadaamiya áte nabi *Ailiya? Am sarte ɲanna Ailiya a de kyuanve ge Dadaamiya geni a valateraarvala ge Iserayiila-aha, a bá ɲane á elvan ge ɲane: ³ Yaakadada-aaruwa, baaka cebareceba nabi-aha á ɲa baɗemme, kyabarnaakyaba tate á faká sadake ge ekka, náwa ya juwá ba iya palle kina ge ɗabakɗába, ba iya ɲanna keni tá kata ba jija. ⁴ Zlanaazle náza-aara, a naba ɲwanánte ge Dadaamiya, a bá ɲane: Ka juwa ka palle-ka, yá an zála debu vuye una magarka hele, kezlaranka ugje ge Baal.

⁵ Daaci am zamáne á miya kina keni, tá á ba anƙwa Yahudiya á ɲere na Dadaamiya a magateraa ɲgurna, a dzeratersehe na. ⁶ Má kwa cenáncena ganakini Dadaamiya a magateraa

ngurna wá, a dzeraterse adaba shagerire á slera-aatare-ka. Ma andze adaba slera-aatare wá, daaci ngurna na gafka ngurna mázle-aara.

⁷ Ay á kátá bamiya uwe ñane elva ñanna? Amaana wá: Bademme á emnde a Iserayiilla-aha-ka una sharánsha názena tá tatayaná itare na. Sey ta shanaa ba emnde cekwa am dagave-aatare, ta shanaa ba emnde na a dzeratersaa Dadaamiya na. Emnde umele-aatare wá, ta magaa degdegire á ire. ⁸ Una ñanna gevge á bá áte una á ndahaná wakita á Dadaamiya, a bá ñane: Dadaamiya a gaterve ba seke emnde na tá an ice á háre, ice-aatare keni á geva an hádá, tá nánka an ñane, hyema-aatare keni ba greñje ba estuwa, tá cenánka na. Sem ba vatená keni ta ba estuwa ñanna, á bina. ⁹ *Dawuda keni ndza a nyanyaterve ba estuwa, a bá ñane:

Kwakyire á náza zuze-aatare na a nyaterfene zlegde na watse á ñáteráña kappe, tá segasheka dekideki am hude-aara na, sey tá mbadembađa bademme, lauktu watse tá tapántápa názena á de magaterná Dadaamiya na.

¹⁰ A garevge wulfe-aha ba uwe keni a naránka dekideki. Sey Dadaamiya á faterarfe zlađa ba kelaazare, watse á zlanazle ndzedá am itare bademme na.

¹¹ Ankwa ndáva-aaruwa zlađe adaliye, a bá iya wá: Am sarte na jaterja ektápaare ge Yahudiya-aha na wá, mbedarmbedá ba kereppe á dem haha emtu? Estuweka. Sera á elva ñanna náwa estuwa: amaana: Itare garega haypa. Daaci Dadaamiya a yaterehe, a maraterán ge

emnde a jeba umele mazle-aara unḡule á sha shifa ḡanna. A magaa una ḡanna, ba ganakini a kumarkuma áza emnde a jeba umele. ¹² Baakire á jirire na ta maganaa Yahudiya-aha na, a sateraa barka ge emnde baḡemme. Keḡa-aatare áte unḡule á Dadaamiya na ni, a sateraa rezegire estuwa ge emnde. Sakwa má watse eptsareptsá á sem sera-aara ḡeme wá, watse kwakya shagerire na á de magaterná Dadaamiya ge emnde baḡemme na.

Paul á fater magiya ge emnde na ta Yahudiya-aha-ka na

¹³ Kina wá, yá elvan ge kure emnde na kwa Yahudiya-aha-ka na: Iya, ganevge slebela á Dadaamiya ásezekure. Yá higa jipu áte slera-aaruwa ḡanna á fiyaare ḡane na. ¹⁴ Yá kátá geni tá kumetekuma Yahudiya-aha á ḡere námpire na á magaterná slera-aaruwa ge emnde umele na, watse yá lyelya emnde umele am itare kena. ¹⁵ Am sarte na Dadaamiya a yaa Yahudiya-aha na wá, kwakya emnde na melaremele antara Dadaamiya am duniya. Sakwa má watse ly-aterválya Dadaamiya ádaliye ḡeme wá, watse kwakya emtakire na tá de shansha emnde baḡemme na. Ba itare na ndza ba seke tá an emtsa na keni, watse á saasa shifa á sem itare baḡemme.

¹⁶ Má á bá am ḡafa palle, takwala zunḡwire tá fán tsekemme ge slera á Dadaamiya, daaci ḡafa ḡanna baḡemme keni ba náza á Dadaamiya. Zlabe adaliye, má tara slalwe-aha antara uksuwe á náfá keni ba náza á Dadaamiya wá, daaci erva-aha á náfá ḡanna keni ba názá á Dadaamiya.

¹⁷ Náwa náfá umele zhera-aara anyaranyara an dzeba am fe á ura, ta naba datsa umele-aha am erva-aha-aara, daaci ta saa erva-aha á umele á sawa am kaamba ba dey, ta se fafanuhe. Erva-aha á náfá na ta sanaa á sawa am kaamba na wá, una nanna á ndahá ba kure emnde na kwa Yahudiya-aha-ka na. Daaci duksa shagera na ndza tá sháná ba Yahudiya-aha na wá, kina kure keni kwá shánsha, ba seke una ni erva-aha á náfá tá shá ndzedá-aatare áte tara uksuwe antara slalwe-aha á náfá na. ¹⁸ Adaba una nanna, epsawaterka d'ekideki emnde na ta ba seke erva-aha á náfá na ta datsaterahe áte mama na. Kwá dzegwánka magateraare kurávire d'ekideki, adaba kure keni kwa slalwe-aha-ka, kwa ba erva-aha áte mama náfá, ba erva-aha una tá shá ndzedá áte tara uksuwe, antara slalwe-aha á náfá. Erva-aha tá taa vaterteka ndzedá ge tara uksuwe antara slalwe-aha.

¹⁹ Ámbane á de bánba ura umele ganakini ta datsa erva-aha náfá nanna áte mama na wá, ba geni tá puwa nere á dem slede-aatare. ²⁰ Una nanna keni ba jirire, amá wá, itare ta tsekwaterahe áte mama adaba fartareka. Ekka na shakánsha slede na keni ka shanaa adaba faktarefe. Effa hyema ba shagera, manka kurávire. Arge una nanna, njinja á ba an lyawa á Dadaamiya am ervaunde. ²¹ Ya ndahanaa adaba uwe una? Adaba má Dadaamiya a magaterá estuwa ge Yahudiya-aha na itare ta ba seke erva-aha nanna á ba an jirire wá, ká kurken ekka wá, watse á yakya emtu má faktareka an jirire? ²² Diyaweddiye ba shagera ganakini Dadaamiya wá, slemággwe jipu, amá slezlada zlabé adaliye:

sleznada jipu áte edda una má á dabeka unjule-aara na. Ge kure kina wá, slemággwe jipu áte kure, amá sey má kwá anjwa dabaná áte názá-aara. Má baaka una, kure keni watse á tsekwákuraatsekwa ba estuwa. ²³ Názá Yahudiya-aha wá, má yaránya mága degdegire á ire wá, una hyefka duksa ázenara, á eptsater-apsa zlafe ádaliye á sem slede-aatare ba seke una á kataná njane. ²⁴ Ekkure emnde na kwa Yahudiya-aha-ka na wá, kwa ba seke erwa-aha á náfá á mbece na tá se fafanu ge náfá na shagera a dzebanaa ura na. Una duksa na á magaaveka dekideki áza emndimagwaha. Má janviyaaka mága duksa estuwa ge Dadaamiya, á de janviya eptsá Yahudiya-aha á sem slede-aatare emtu? Itare ta emnde na á bá am fantaufe keni ta erwa-aha á náfá njanna an jirire ba itare!

Iserayiila-aha bademme watse tá de nezlesenjeze

²⁵ Egdzar mama-aha-aaruwa, kwa emnde na gakurevka Yahudiya-aha na wá, yá kátá marakuránmára názena ndza nasherire na. Zlafe ádaliye yá kátá kwá maga enjale, bawanka: Njá áte ire ba njere arge Yahudiya-aha. Náwa nasherire njanna: Yahudiya-aha umele ta naba maganaa degdegire á ire ge Dadaamiya, amá wá, geni tá njá ba estuwa dem ba ge dekideki-ka. Am sarte na má de fartárfé emnde a jeba umele na a dzeratersaa Dadaamiya am duniya na bademme, itare keni tá de eptsá á sem sera-aara. ²⁶ Daaci má estuwa wá, *Iserayiila-aha bademme watse tá nezlesenjeze ba seke una

á ndahanaa wakita á Dadaamiya na. Am wakita, a bá ñane:

Watse á jesaarje slelya ura am berni á *Siyauna, á de bezaterá ñane haypa-aha-aatare ge emnde á Yakubu. ²⁷ Zlabe ádaliye, a bá Dadaamiya: Watse yá ñgudá namána-aaruwa antara itare am sarte na má watse yá yateraare haypa-aha-aatare na.

²⁸ Má ge cená labáre á higa wá, Yahudiya-aha cenarka ðekideki, garevge kelaade-aha á Dadaamiya. Una ñanna keni á wayakurantá ba Dadaamiya ge kure. Amá má áte dzera emnde-aara na a maganaa ñane wá, ta náwiyá-aha ba itare, adaba ndza ta shan werre eggye-aha-aatare áza Dadaamiya. ²⁹ Adaba má Dadaamiya dzersedzere emnde-aara, a gaterar barka wá, una ñanna náza dem ba ge ðekideki, ñane á eptseka elva-aara ðekideki. ³⁰ Werre, ndza kwá emnde na fakuransáreka ge Dadaamiya na ba kure. Amá kina adaba degdegire á ire á Yahudiya-aha wá, Dadaamiya á magakurá zevarzire. ³¹ Watse ba estuwa ge Yahudiya-aha keni. Kina wá, zlabe itare tá maganá ba degdegire á ire ñanna emtsaade ge Dadaamiya, ñane keni á magakurá shagerire ba ge kure. Amá wá, á magán ba geni a diyareddiye Yahudiya-aha á ñere ganakini hyarephye geni á zatervárze Dadaamiya, a sarsawa á sem sera-aara. ³² Daaci á belaterná ba Dadaamiya baráma ge emnde bademme geni a faransáreka na. Adaba am iga-aara, á kátá maraterá zevarzire-aara ge emnde bademme.

Yaikkire á Dadaamiya wá, jauje ge duksa bademme

³³ Dadaamiya wá, duksa bademme á bá ázeɲara, slemággwe jipu áte emnde. Baaka ura á diyeddiye enkale-aara, antara diya-aara, ira názena a njeta ɲane ganakini á emmága na, baaka edda una á dzegwándzegwa pakya sera á názu am ire-aara dekiɲeki. ³⁴ Ba seke una ni ta puwetaa am wakita á Dadaamiya, a bá ɲane: Ware edda una diyaadiya názena á slaslaná Yaakadada na? Áme edda una á dzegwándzegwa geva slesawari-aara na? ³⁵ Emtu aɲkwa edda una ndza a vanta duksa ge Dadaamiya, aɲkwa á dabaná áte gema emtu? Ura estuwa á jarka dekiɲeki, á bina. ³⁶ Adaba duksa bademme a nderanaa ba ɲane. Má uwe keni á ɲaná ba ɲane, bademme ba náza-aara. Galaumigálá ba ɲane palle dem ba ge dekiɲeki. *Aamin.

12

Elva á shifa á edda una átuge Dadaamiya

¹ Yá ɲalákurá adaba una ɲanna egdzar mama-aha-aaruwa, geni kwá yaná ire á kure bademme ge Dadaamiya. Shifa á kure a gevge ba seke zhel kyawe na tá icaná sadake-aara ge ɲane na. Njawinja an cufedɲire áte una á kataná ɲane. Magaumága á ba áte una ɲanna, adaba ɲane a zamivarhe, a magamiyaa maggwire kwakya. Uɲɲule á kezlaná ugje ge Dadaamiya an jirire wá, baaka arge una ɲanna. ² Dabauka mága á emnde a duniya na. Amá yawánya a ept-sakurteptsá ba Dadaamiya an hakuma-aara, a

vakurteva ba ɲane eɲkale á jirire, kwá gevge ba seke ndza kure-ka. Daaci má gakurevge estuwa, watse kwá naba diyeddiye názena á kátáná ɲane keni. Nazena á kátáná ɲane na wá, amaana: duksa na shagera na, antara una má hayánháyá ɲane na, ira duksa na áte unɲule-aara na.

³ Adaba ɲgurna na a maginaa Dadaamiya, a naba give slebela-aara na wá, yá naba ndakurn-daha iya ma ge ware á kure keni, ganakini ma ware á kure keni a kanteka ba ɲane ire-aara an kuráviye, amá a tsaatse á bá áte deydey á ndzedfa-aara na a vantaa Dadaamiya ge mága slera am fetarfire-aara. ⁴ Vuwa á urimagwe wá, ba palle zelette. Amá wá, an ubiya-aha antara duksa-aha gergere kwakya, daaci ma uwe keni slera-aara ba tsekemme am vuwa ɲanna. ⁵ Njá á miya keni ba estuwa ɲanna. Ma kwakya, amá mi ba seke vuwa á ura palle. Badfemmiye á miya má á ba an másláva an másláva. Adaba gamiyevge palle antara Yaisu *Almasiihu keni. ⁶ Zlafe ádalaye, Dadaamiya a magamiyaa ɲgurna kwakya, a tegamiyaa hákuma á mága slera-aha keni gergere badfemme. Daaci ma ware á miya keni a emmága slera-aara an hákuma na a vantaa Dadaamiya ge ɲane. Daaci edda una a shaa hákuma á mága slera á nabiyire, sey a emmága á ba áte unɲule-aara ba seke una a bannaa Dadaamiya na. ⁷ Edda una ɲane a shaa hákuma á melateru ge emnde, ɲane keni a emmága slera-aara. Edda una a shaa hákuma á kwaraterse duksa ge emnde keni, a ɲánáɲa slera-aara. ⁸ Edda una a shaa hákuma á

faterem ndzedfa am vuwa ge emnde áte unjule á Dadaamiya, a emmága. Edda una a shaa hákuma á melateru ge emnde an nalmáne-aara, sey a emmága an ervaunđe-aara palle. Edda una njane a shaa hákuma á geve slekatafke á emnde keni, a emmága slera-aara an shagerire á ervaunđe. Edda una a shaa hákuma á mága maggwire, njane keni a emmága á ba an higa.

⁹ Wayauka emnde á ba áte we ba dey, amá wayauterwáyá an ervaunđe á kure palle. Fauka vuwa á kure am tata á mága shagerkire đekideki, ma vaatara keni kure magaumága ba shagerire. ¹⁰ Magaumága wáyáva am dágave á kure áte wáyáva á egdza mamire; ma ware á kure keni a effa zherwe áte emnde umele an shagerire á ervaunđe. ¹¹ Gawuvka emnde á masefe am slera á Yaakadada, amá gawuvge emnde a ndzendzedfa am slera njanna, kwá maganá an ervaunđe á kure palle. ¹² Ma vaatara keni gulawanaaka higa á kure đekideki, adaba kwá anjwa an tama áte duksa á Dadaamiya. Ma am zladfa-ara keni, faufa ervaunđe ba shagera, ma vaatara keni gulawanaaka maduwa á kure đekideki. ¹³ Melawaterumele ge egdzar mama-aha á kure emnde a fetarfe na tá taa hyanveka ge wedera-aha-aatare na. Lyyaulyyiya wayve-aha á kure keni an erva buwa.

¹⁴ Gawaterga barka ge emnde na tá anjwa fá zladfa áte kure, yekawaterarka emtanjire đekideki. ¹⁵ Má tá am gedfa emnde, kure keni higauhiga antara itare; má tá an yawe á kyuwa am ice itare, kure naba kyuwaukyuwa antara itare. ¹⁶ Njawinja á ba áte ye palle antara

sleriya-aha á kure. Magauka kurávire d'ekid'eki, ma slera-ara keni naba magaumága, bawánka ganakini slera na zlaya á ñere-ka. Zharauka ire á kure ba seke kwa emnde na kwakya diya á kure.

¹⁷ Má ura a magakuraa emtañkire, eptsawannaaka an emtañkire. Ekkure wá, tatayautátáya mága shagerire na watse emnde bademme tá de zlebakurzleba átekwa na. ¹⁸ Ekkure wá, mákini kwá shánsha wá, ma estara keni magaumága názena kwa dzegwanaa kure ganakini kwá njinja an hairire antara emnde bademme.

¹⁹ Daaci egdzar mama-aha-aaruwa, kure wá, eptsawaternaaka emtañkire na tá magakurná emnde na an emtañkire, yawánya, watse á eptsaterná ba Dadaamiya má watse nahetenáhá am ervaunđe-aara. Adaba anjwa an puwa am wakita á Dadaamiya ganakini: A bántsa Yaakadada Dadaamiya: Watse yá eptsaternáptsa ba iya emtañkire-aatare, yá de peláná ba iya degun-aara. ²⁰ A bá ñane zlađe adaliye: Má á wáná waya ge slekeláade á ña wá, naba vanteva ka názu á zuze; má á wáná ndera, vanteva názu á shushe. Má ekka magakanaamaga una ñanna, jakja an lindi zlauzle. ²¹ Yawanánka baráma d'ekid'eki ganakini emtañkire á egga midalire arge kure, amá gawegga ba kure midalire an mága maggwire.

13

Fawatersarfe ge emnde na tá an hakuma á ngumna

¹ Sey emnde bademme tá fatersaarefe ge emnde na tá an hakuma á ngumna. Adaba bademme á emnde á hakuma, a vatertaa ba Dadaamiya hakuma nanna, a fanaa ba nane ngumna nanna. ² Daaci ma ware una á maganá garda ge edda á hakuma á ngumna keni, edda-aara a ebzu ba elva á Dadaamiya. Emnde a mága una nanna tá anƙwa fa ire-aatare á dem zawa. ³ Má ura á maga ba shagerire, nane baaka lambe-aara átuge emnde a hakuma. Sey ba emnde a magá shagerkire una tá njá á bá an lyawa átuge itare na. Daaci má wayanƙa nja an lyawa átuge male-aha á duniya wá, emmága ba shagerire, watse tá hayák-haya. ⁴ Adaba itare keni ta emnde a slera á Dadaamiya, tá anƙwa mbakurse ba mága shagerire. Má gakúge emtanƙire wá, una wá, sey ká kuvaterkuva, adaba hakuma na a vatertaa Dadaamiya na gavka ba dey. Itare keni a tsateraa ba Dadaamiya ganakini tá gevá emnde a slera-aara. Edda una má á maga emtanƙire wá, itare tá pelansepele an emtanƙire-aara. Daaci una nanna á mara ba duksa na am ervaunƙe á Dadaamiya na. ⁵ Adaba una nanna, shagera ba kwá fatersarefe ge male-aha á duniya. Una keni, a gevka adaba kwá kuva zladá, amá adaba diyakurdiya am ire á kure ganakini una nanna an unƙule-aara.

⁶ Hadáma keni kwá puwaná adaba ba una nanna. Adaba itare emnde a ngumna nanna keni, a bazlateraa ba Dadaamiya geni a magarmága slera nanna áte shagerire. ⁷ Vawaterteva ma ge emnde-ara-aatare keni bademme. Adaba á belateraa ba ngumna. Vawaterteva hadáma-

aatare ge *emnde a jáhá hadáma; ma emnde a jaha uwe keni, vawaterteva ge emnde a jaha názena a tsanaa ngumna na bademme. Faufa dárádza áte emnde na hyarephye geni kwá fa dárádza áte itare, faufa zherwe áte emnde na máki zlaya-aatare na keni.

Wáyávire áte sleriya

⁸ Njawka an gema áte kure dëkideki. Názena á njá áte kure ba seke gema na baaka halavuwa-aara dëkideki na ge kure wá, ba mága wáyávire áte emnde. Máki ura wayawáya an emnde wá, edda-aara maganaamaga názena am shairiya-aha á Dadaamiya na bademme. ⁹ A bá shairiya-aha á Dadaamiya wá: Maŋka gwardzire, jeka shifa, ileka, feka ice á ña am duksa á emnde. Bademme á shairiya-aha ñanna náwa itare na, antara ba umele-aha na zlaɓe tá aŋkwa na keni, tá á bá am huɗe á shairiya palle na a bá: Ewwáyá sleriya á ña ba seke ire á ña, á bina. ¹⁰ Edda una má wayawáyá an sleriya-aara wá, á maganáka emtaŋkire. Daaci máki wayakwáya an sleriya á ña wá, ekka magakanáamaga názena á ndahaná shairiya-aha á Dadaamiya na bademme.

Tsakwawamitsakwa hyema aŋkwa á sawa Yaisu

¹¹ Daaci estuwa, wavauwáva ba shagera ge mága una ñanna, adaba ba kure keni diyakur-diya ganakini zamáne na, zamane á kwá pá hare amkweka. Áza Dadaamiya wá, herzhapteherzhe sarte á lya shifa á miya náza ba ge dëkideki. Seke una am fantaufe á miya ge fetaare áte

Yaakadada Yaisu *Almasiihu na ka mazla-aara. ¹² Kina wá, gevge ba seke má herzhe á wera ekse, á zláá tabedammire mázle-aara. Daaci halaumiyantehálá kazlaŋa na mí de wava an ŋane na am erva, yawamiyánya shagerkire na tá maganá am tabedammire na mázle-aara. ¹³ Njauminja áte unŋule-aara ba seke emnde na tá zlála an vaciya na. Faumifa hyema mázle-aara, gaumiyevka emnde a mbazla, bi emnde a mága máme, antara gwardzire, an dágaldagala, an shelha áte ura, ira mága dakarire. ¹⁴ Amá eksawanteksa hala-aha á Yaakadada Yaisu Almasiihu ba seke kazlaŋa á wáva á kure. Shagerkire na á kataná ervaunŋe á kure na, á ba an ire keni dzamauka mázle-aara.

14

Habazauka sera á emnde

¹ Má áte elva á wáyávire am dágáve á kure wá, viyawanaaka edda una zlaŋe gypka am fetarfire na, habazauka sera á názena a fetaara ŋane am ervaunŋe-aara ge shagerire na. ² Náwa yá bakurá jeba á elva-aha ŋanna áte náza za: Ura umele, ŋane gyepgye am fetarfire, diyaadiya ganakini ma uwe keni á diya ba ezza bademme. Daaci ŋane, baaka názu á yainya, á ezza bademme. Mbate, edda una zlaŋe gypka am fetarfire na, bademme á hyuwa ŋane á feka áte we-aara d'ekid'eki. ³ Daaci edda una baaka názu a yanaa ŋane na keni, a epsaweka edda una á dzeraná an dzera duksa na. Iyau, edda una ŋane á zá ba daugdza-aara na keni, a habazeka sera á edda una bademme hyuwa á ezza na. Adaba

baaka edda una a yanaa Dadaamiya am itare. ⁴ Há! Ábi ñane nave á Dadaamiya. Ekka edda una ká habaza sera á náve á ura na, ka hyef ware ka? Ma á maganá áte unñule-aara ñane, ma á mañka áte unñule-aara watse á de mbedfa keni, naba yainya ka watse á banánba ba edda-aara ge ñane. Ñane keni á mbedfeka cfeme. Á hyefhye ndzedfa á Yaakadada Yaisu *Almasiihu ge tsanmártse.

⁵ Zlafe ádaliye, áza ura umele, váha umele jauje ge háre-aha umele bademme. Amá áza ura umele wá, bademme háre-aha ta ba kalkale. Ge jirire wá, shagera ba ma ware keni a diyeddiye ba ñane názena am ervaunđe-aara ge cfaba barama shagera. ⁶ Edda una ñane á fá dárádza á ba áte váha palle am háre-aha á bere na keni, á kátá zleba ba Yaakadada an ñane, ba seke náza edda una á dzereka na. Iyau, edda una bademme hyuwa á ezza na keni á zleba ba Yaakadada an ñane, adaba zunñwe á slafaná we ba ge ñane emtsaade. Edda una ñane wayaaka zá duksa bademme na keni, ñane keni á magán ba ge zleba Yaakadada, á slafaná we-aara ba ge Dadaamiya ñane keni adaba názena á záná ñane.

⁷ Nawa yá bakuranba zlafe ádaliye geni, baaka edda una am dagave á miya á njá an shifa ge ire-aara, baaka edda una watse á emtsa ge ire-aara keni. Miya wá, ma má an shifa keni, má an shifa ba ge Yaakadada á miya. ⁸ Ma má an emtsa keni, má an emtsa ba ge ñane. Daaci ma má á bá an shifa á miya, ma má an emtsa keni, bademme

á miya ma ba náza-aha-aara. ⁹ Adaba ɲane ndza a emtsehe, amá tsettse am fáyá geni á gevge Yaakadada á emnde na tá an shifa, antara emnde na tá am fáyá keni baɗemme. ¹⁰ Ay a dakmá uwe ge ekka, ká habaza sera á egdza emmeɲa na? A dakmá uwe geni ká epsawa egdza emmeɲa na? Ábí watse baɗemme á miya mí de tse á katafke á Dadaamiya á de kyáná ba ɲane palle shairiya á miya? ¹¹ Adaba aɲkwa ndahán ba estuwa wakita á Dadaamiya, a bá ɲane:

Á bántsa Dadaamiya Yaakadada: Baɗemme á emnde, watse tá se ba am sera-aara, tá se ndahaná ba itare an we-aatare geni ya Dadaamiya ba iya.

¹² Daaci estuwa, ma ware keni watse á de ndahaná ba ɲane an we-aara á katafke á Dadaamiya názena ndza a maganaa ɲane na.

Maɲka názena á de vanta ektápaare ge egdza emmeɲa

¹³ Daaci má estuwa wá, ma ware keni a yanya hábaza sera á egdza emmeɲara na mázla-aara. Náwa názena kwá de maganá kure arge una ɲanna: Baɗemme a názena máki watse á vanta ektápaare ge egdza emmekure, watse á mbeɗa á dem haypa adaba kure na, magauka duksa ɲanna ɗekideki. ¹⁴ Am gaɲerevge palle an Yaisu *Almasiihu, diyandiya ba jirire ganakini baaka duksa na gevge haram ba ge ire-aara na. Amá ge edda una ɲane á zharán ba seke shagerka na wá, má zuze keni á zu ba haram ɲanna ba jire. ¹⁵ Máki ká aɲkwa za duksa na watse á de fanem shuɲɲula am ervaunɗe ge

egdza emmeṇa wá, daaci ekka dzalakevdzala áte baráma á wáyávire á katafke-aara. Yaisu Almasiihu a naba yá ire-aara, a naba emtsehe adaba egdza emmeṇa ṇanna, mbedfanaaka ka adaba duksa na ká záná á ba á dem huḍe na. ¹⁶ Ekka wá, ndavakanundave ge ervaunḍe á ṇa, amá má diyakdiya ganakini watse tá de wesha elva emnde adaba ekka wá, shagera ba ká yainya. ¹⁷ Adaba am tate na á nja Dadaamiya an sleksire-aara wá, duksa yaikke ba kazlaṇa na á vaterta Shedekwe Cudedḍe ge emnde na. Kazlaṇa ṇanna wá: Ba nja an jirire, antara hairire, ira higa. Yaikke ba una-aha ṇanna arge elva á náza za, antara elva á náza sha. ¹⁸ Edda una máki aṅkwa á maganá slera ge Yaisu Almasiihu áte una ṇanna wá, ṇane shánsha háyá yaikke áza Dadaamiya, ba emnde keni tá de zleba ba ṇane.

¹⁹ Adaba una ṇanna, wavaumíwáva ba shagera ge mága názena watse á samiya ba hairire, watse á dá emnde á Dadaamiya á de katafke na. ²⁰ Badzanveka ka názena a maganaa Dadaamiya á ba adaba elva á náza za. Náza za wá, diyamidiya ganakini baaka una haram ba ge ire-aara na. Amá máki watse á de magaterá ektápaare ge emnde wá, zlaya á ṇa-ka mázla-aara ba ge faná áte we keni. ²¹ Duksa na ká maganá ka wá, máki watse á de vaterte ektápaare ge egdzar mama-aha á ṇa na wá, ma hyuwa, ma mbazla, ma uwe keni, yáinya ba ḍekideki. ²² Názena ni ka disaa ka am ervaunḍe á ṇa áte jeba á duksa-aha ṇanna wá, a njinja á ba am huḍe á ṇa, am dágave á kure an

Dadaamiya. An barka ba edda una á njá á ba an higa áte názena a maganaa ñane. ²³ Amá edda una a naba zu duksa an shaige am ervaunđe, ñane wá, femfa ire-aara am záwá, adaba a gu duksa na baraaka am ire-aara. Baɗemme á názena á maganá ura, má njanteka ba shagera am ervaunđe-aara ganakini gevge halál wá, una ñanna haypa.

15

Elva a mága duksa na watse emtáke áte emnde

¹ Daaci miya emnde na gyainjerebgye am fetarfire na wá, shagera ba mí melaterumele ge emnde na zlaɓe cekwa ndzedá-aatare na, zharaumika ba ire á miya palle. ² Ma ware á miya keni, magaumimága názena watse emtáke áte egdzar mama-aha á miya, watse á dáterá á de katafke am elva á Dadaamiya na. ³ Ba seke una Yaisu *Almasiihu, ñane ndza zharaaka ire-aara. Ankwa elva-aara am wakita á Dadaamiya, a ba ñane: Zlázle na ta zlazláká emnde na a ept-siyaare ge iya, a ba ñane. ⁴ Baɗemme á názena ta puwetaa am wakita á Dadaamiya werre na, ndza ta puwete ba ge kwaramise duksa áte ñane. Dadaamiya á kátá famiyem ndzedá am vuwa, á kátá kwaramise farvaunđe, á weramita estuwa ice áte duksa-aara, geni mi fetefa tama á miya átekwa. ⁵ Dadaamiya edda á vanta farvaunđe, antara edda á fanem ndzedá am vuwa ge ura, a jakurammeje ye á kure, lauktu ma uwe á kure keni kwá maganá á ba áte názá á Yaisu

Almasiihu. ⁶ Zlaɓe áɗaliye, lauktu baɗemmire á kure kwá de gálá Dadaamiya Eddenjara ge Yaisu Almasiihu an ervaunɗe á kure palle, kwára á kure keni átirpalle.

A higarhiga emnde baɗemme am duniya

⁷ Ba estuwa egdzar mama-aha-aaruwa, ba seke una ni a naba lyakurvahe ge Yaisu *Almasiihu ge kure na wá, kure keni lyiyauliyi emnde an ervaunɗe á kure palle. Magaumága una ɗanna, geni baɗemme á emnde a galargálá Dadaamiya. ⁸ Yá ndaakur ba jirire, Yaisu *Almasiihu wá, ɗane a se melateru ge Yahudiyaha, geni á maraterá jirire á Dadaamiya, geni ɗane á eptseka elva-aara ɗekideki áte duksa na ndza a ndaater ge eggye-aha-aatare werre, ganakini watse tá shánsha na. ⁹ Zlaɓe áɗaliye, a sawa geni emnde a jeba umele keni a galargálá Dadaamiya aɗaba zevarzire-aara. Ba seke una aɗkwa ta puwete am wakita á Dadaamiya, a ba ɗane:

Yá de galáká am dágave á emnde a lárde-aha á duniya baɗemme, watse yá galakgálá am láhe-aaruwa.

¹⁰ A ba am wakita á Dadaamiya ɗanna zlaɓe áɗaliye, a ba ɗane:

Ekkure emnde a lárde-aha á duniya baɗemme, higauhiga antara emnde a lárde na a ekkesaa Dadaamiya na.

¹¹ Zlaɓe zlauka emtsaɗe, a ba ɗane zlaɓe áɗaliye:

Baɗemme á kure kwa emnde a lárde-aha umele, galaugálá Dadaamiya Yaakadada, a jerka ura ɗekideki ni ɗane galaaka na.

¹² Nabi Aisaya keni ndza a enndáhá, a ba ñane: Watse a jerje ura am emnde á Yaisa, ñane á se gev slekse arge emnde a jeba umele keni baðemme. Baðemme á emnde a jeba umele keni tá de shá táma á shifa aɗaba ñane.

¹³ Daaci Dadaamiya edda á vante táma ge ura, a vakurteva hairire geni kwá higetehiga am ervaunɗe á kure, aɗaba fetarfire á kure áte ñane. Daaci estuwa, táma á kure na áte ñane na keni, watse a gyevgye ba seke duksa-aha ñanna dámda am erva á kure zlauzle. Á de vakurte jeba á táma ñanna an hákuma á Shedekwe Cudedɗe.

Názena a berha Paul ge puwete elva na

¹⁴ Egdzar mama-aha-aaruwa, diyandiya ba jirire ganakini shagera ervaunɗe-aha á kure, diyakurdiya unɗule á Dadaamiya baðemme, hayaikurefhye ge tsanmaaretse ge ire á kure am dagave á kure. ¹⁵ Aley keni wá, á piyiteka duksa geni yá puwakurtepuwa elva-aha umele am wakita-aaruwa ñanna náwa ñane na, yá ndaakur elva-aha ñanna á ba an ndzedá, geni yá sanaasa enkale-aha á kure áte duksa na ba kure keni diyakurdiya na. Iya ñanna yá bakurá elva estuwa na keni, a maginaa ba Dadaamiya ngurna-aara. ¹⁶ Ngurna na a maginaa Dadaamiya na wá, aɗaba a give sleslera á Yaisu *Almasihu am dagave á emnde na garevka Yahudiya-aha na. Nannaanja slera á balaterá labáre á higa ge emnde na garevka Yahudiya-aha na an ervaunɗe-aaruwa palle ba seke *liman á Dadaamiya. Yá kátá

itare keni shifa-aatare á gevge shagera am ice á Dadaamiya, ba seke sádáke na tá vantá emnde-aara áte namaari-aara, an hákuma á Shedekwe Cufedde. ¹⁷ Adaba una nanna, am nja-aaruwa am erva á Yaisu Almasiihu na wá, gedantedeđa jipu am slera á Dadaamiya na yá anƙwa maganá ya. ¹⁸ Baaka elva na yá ndahaná ya an ndzedaaaruwa bademme seke názena a maganaa Yaisu Almasiihu am slera-aaruwa ge sa emnde na garevka Yahudiya-aha á sem sera á Dadaamiya, geni itare keni a faransaarefe. A magaa duksa nanna á kya slera-aaruwa, antara elva-aha na a segáshe am mbuwe-aaruwa na. ¹⁹ Shedekwe Cufedde keni marsemáre hákuma-aara, ya magaa najipu-aha gergere kwakya, baaka názu ya shebanvaa ya am labare á higa, elva a Yaisu Almasiihu na ya balanaa iya. Ya fantau am Urusaliima, kwaye ya de halavuwa átevege Iliriya. ²⁰ Wayanwáyá jipu bálá labare á higa, elva a Yaisu Almasiihu am ekse-aha na ndza cenaránka emnde elva-aara dƙidƙeki na, arge am ekse-aha na emnde cenarácena zlauzle na, geni a danka á de dzegwanu ge slera á ura umele. ²¹ Yá kátá maganá áte una anƙwa ta puwete am wakita á Dadaamiya na, a ba nane: Emnde na ndza barateránka elva áte nane dƙidƙeki na, baira watse tá zharanaazhara á ba an ice-aatare. Emnde na ba uwe keni ndza cenaránka áte nane na keni, watse tá cenácena.

Paul maganaamaga niya a dem Rauma

²² Ser kwakya ndza yá kátá dezekure, amá shanapteka adaba ba una nanna. ²³ Iva

wányara-wányara una yá kátá ba dezekure, amá shapteka dfekideki, á piyita ba slera-aha. Amá kina wá, zlauzle slera-aaruwa am ekse-aha ñanna. ²⁴ Kina wá, njanantenja mázla-aara geni sey yá dem larde á kure emtsaafé, yá de puwansepuwe ázekure, lauktu watse yá zlalá á dem Aispaniya. Daaci má watse yá tse ázekure wá, yá kátá ma kwá meliyumele am shula-aaruwa ñanna.

²⁵ Amá am kinire na wá, zlafe yá eptsa á dem Urusaliima emtsaafé, adaba anjwa egdza slera yá de magaterán ge emnde a fetarfe na tá áhuwa. ²⁶ Slera ñanna wá, amaana: Emnde a fetarfe na tá am Makiduniya, antara emnde na tá am Akaya, ta magaa niya á melateru ge emnde a fetarfe na tá am Urusaliima cekwa duksa-aatare na, an názena a shanaa erva-aatare. ²⁷ Una ñanna keni ta shantuwa ba itare an ire-aatare. Ge jirire wá, ta magaa duksa shagera, zlaya jipu. Adaba ndza ta melateruwa ba Yahudiya-aha zuññwe, lauktu tá shá barka estuwa áza Dadaamiya. Daaci itare keni zlaya ba ta melaterumele an nalmáne na am erva-aatare. ²⁸ Ba seke una ya ndakurndáha na, máki zlan-naazle slera á da sadake ñanna, má danateránda nalmáne ñanna sesse am erva-aaruwa wá, watse yá dedde emtsaafé á dezekure, lauktu watse yá meláná á dem Aispaniya. ²⁹ Ba jirire diyandiya ganakini ma watse danemda ya am dagave á kure, nja na ni watse mí de njá antara kure na wá, Yaisu *Almasiihu á de gamiyar barka an tsaka ire.

³⁰ Egdzar mama-aha-aaruwa, yá ñalákurá

adaba Yaakadada Yaisu Almasiihu, antara adaba wáyávire na a vamitaa Shedekwe Cudedde na, melawiyumele an maduwa-aha á kure, nalauminjálá Dadaamiya an ervaunđe á miya palle, yawamiyánka dekideki. ³¹ Magaumága una nanna, geni a nezliyaanezla Dadaamiya áza Yahudiya-aha á ntere na fartareka áte Yaisu Almasiihu na am Urusaliima, antara geni wedere na á diye á dehuwa na keni a lyarvaalya emnde a fetarfe na tá áhuwa an erva buwa. ³² Daaci estuwa, má wayetewáyá Dadaamiya wá, yá de shákurá á ba an higa am ervaunđe, yá de puwansepuwe am dágave á kure. ³³ Dadaamiya wá, edda á hairire ba nane, a njinja an kure bademme. *Aamin.

16

Paul á gater use ge emnde an zhera an zhera

¹ Náwa yá anƙwa bakurá elva áte egdza emmemiya mukse, zhera-aara Faibe, nane egdza emmemiya am elva á Yaisu *Almasiihu. Yá ndaakurá ba iya una: Nane sleslera á Dadaamiya jipu am Kainƙairiya. ² Daaci má daada mukse nanna am dágave á kure wá, lyauvaalya an erva buwa áte una ni á lyayáter ge emnde a fetarfe na. Melawanumele am wedere-aha-aara bademme. Adaba nane keni á magaterá maggwire ge emnde kwakya, ba iya na keni tapannaatápá maggwire-aara.

³ Gawaterga use-aaruwa ge tara Piriskila, antara zhele-aara Akilas, itare ta emnde na ndza nana magaa slera á Yaisu Almasiihu kerde. ⁴ Ndza ta hayaa ba á kefa shifa-aatare adaba iya. Itare

wá, yá zlebáterá ya palleka, bademme á emnde a fetarfe na garevka Yahudiya-aha na tá zleba ba itare. ⁵ Yá an̄kwa gater use-aaruwa ge emnde a fetarfe na tá jáháva am mba-aatare ge cena waazu na keni bademme. Yá an̄kwa gan use-aaruwa ge ura-aaruwa Aipaynaitus, slezuŋŋwe ge fetaare áte Yaisu Almasiihu am haha á Aziya. ⁶ Gawanga use-aaruwa ba kwakya ge Maari keni, ŋane mukse na wawaawáva jipu ge melakurumele am slera. ⁷ Gawaterga use-aaruwa ge emnde a jeba-aaruwa tara Andaraunikus, antara Yuniyus na ndza ŋgwadaraŋeráŋgwada am dangay antara itare na. Má ge fetaare áte Yaisu Almasiihu wá, ta emnde a zuŋŋwe ba itare arge iya, ta emnde a belá á Dadaamiya, diyardiya emnde a fetarfe una ŋanna bademme.

⁸ Yá an̄kwa gan use-aaruwa ge Ampliyatus, ŋane ura-aaruwa jipu, a jaŋermaa ba Yaakadada. ⁹ Yá an̄kwa gan use-aaruwa ge Urbanus ŋane keni sleslera á Yaisu Almasiihu ba seke miya, ira ura-aaruwa Istaki. Gawaterga use-aaruwa bademme-aatare. ¹⁰ Yá an̄kwa gan use-aaruwa ge Apailais, ŋane edda una bashubáshe duksa adaba zhera á Yaisu Almasiihu, marsemáre ba parakke ganakini ŋane fetarfire. Gawaterga use-aaruwa ge tara Aristubul antara emnde a huđe á há-aara bademme. ¹¹ Yá an̄kwa gan use-aaruwa ge Hirudiyaun, ŋane keni ŋa ba palle, antara emnde na tá am huđe á há á Narkisu na tá an̄kwa daba Yaakadada na keni, gawaterga use-aaruwa bademme. ¹² Yá an̄kwa gater use-aaruwa ge egdzar mama-aha á miya ŋwasha, tara Tarifina, antara Tarifusa,

ɲwasha na tá aɲkwa wawa jipu an slera á Yaakadada na, ira Pairsis, ɲane keni ba egdza emmemiya mukse na wayamiwáyá jipu, aɲkwa á wawa jipu ge maganá slera ge Yaakadada na. Yá aɲkwa gan use-aaruwa ba kwakya. ¹³ Yá aɲkwa gan use-aaruwa ge Rufus, ɲane sleslera á Yaakadada na an diya na, tá antara emmeɲara na ya gev ba seke egdza á huɗe-aara na. ¹⁴ Yá aɲkwa gater use-aaruwa ge tara Asin̄kiritus, an Filigaun, an Hairmais, an Patraubas, an Hairmas, ira egdzar mama-aha á miya emnde a fetarfe na tá antara itare, yá aɲkwa gater use-aaruwa bademme-aatare. ¹⁵ Yá aɲkwa gater use-aaruwa ge tara Filaulaugus, antara Yuliya, ira Nairiyus tá an egdza emmeɲara mukse. Yá aɲkwa gater use-aaruwa ge tara Aulimpas, tá antara emnde a ɗaba Dadaamiya na ta kerɗe na, yá aɲkwa gater use-aaruwa bademme-aatare.

¹⁶ Gauga use-aaruwa am ɗágave á kure an ekhya ervaunɗe á egdza mamire. Bademme á emnde a ɗaba Yaisu Almasiihu na tá am ekse-aha áhuna tá aɲkwa gakur use-aatare ba kwakya.

Tsufautsufa ire á kure tá aɲkwa emnde a mbáɗá ura

¹⁷ Yá ndaha ba kure egdzar mama-aha-aaruwa: Tsufautsufa ire á kure ba shagera, aɗaba tá aɲkwa emnde na tá sá ba náza tega ye á emnde, ta mbadaa egdzar mama-aha-aatare kwakya, itare tá njá á ba maga ba gá jáwe arge elva na kwa tsahesaa kure zlauzle na. Njauka antara jeba á emnde ɲanna ɗekideki. ¹⁸ Jeba á emnde ɲanna tá wavanu ba ge ire-aatare, palle á názu tá maganán ge Yaakadada

Yaisu *Almasiihu wá, baaka dekiðeki. Tá ekhyaterá kwará lailaidde ge emnde an elva-aha emtáke emtáke, tá jaterá estuwa enkale ge emnde na zlaðe cekwa diya-aatare na. ¹⁹ Amá ázekure wá, una ñanna á taa gevka dekiðeki. Baðemme á emnde diyardiya fesarefire á kure áte Yaakadada. Ekkure wá, higakuritehiga jipu. Daaci yá kátá á farfe zlaðe áðaliye enkale á kure ge mága maggwire, weshawanteka an mága kelaadire. ²⁰ Áza Dadaamiya edda á hairire wá, a juwa ba keskiya mázla-aara ganakini á de ñgerðanñgerða Shaitaine, watse kwá de puwa sera á kure áte ñane.

A magakuránmaga Yaakadada Yaisu Almasiihu ñgurna ge kure baðemme.

²¹ Á ankwá á gaktur use-aara Timaute sleslera á Dadaamiya ázerwa. Emnde a jeba-aaruwa tara Lukiyus, antara Yasaun, ira Sausipaterus, itare keni tá ankwá gaktur use-aatare.

²² Kina wá, iya Tairtiyus na ya gev erva á Paul, yá puwaná ya wakita na keni, yá ankwá gaktur use-aaruwa baðemme á kure an zhera á Yaakadada.

²³ Ankwá á gaktur use-aara patuma-aaruwa Gayus; emnde a fetarfe umele na tá áhuna na keni baðemme tá tsekwa á ba am mba-aara. Tara Airastus patáka á ñgumna am berni na, tá antara egdza emmemiya Kawartus, tá ankwá á gaktur use-aatare itare keni.

((²⁴ A hyantehya Yaakadada Yaisu Almasiihu ñgurna-aara áte kure baðemme á kure. *Aamin)).

Elva a gálá Dadaamiya

²⁵ Galaumigálá Dadaamiya, edda á hákuma ba ɲane ge ndzedʼakurte-ndzedʼa áte una tá ndahaná am labáre á higa na yá aɲkwa balaterná iya ge emnde na. Elva ɲanna wá, á maramiya názena ndza a slanaa Dadaamiya werre, ndza nasherire-aara ba ge ɲane palle na. Amaana wá, ndza marateránka Dadaamiya elva ɲanna ge emndimagwaha estuwa. ²⁶ Amá kina wá, adaba barka á puwa na ndza ta puwetaa nabi-aha werre áte elva á labare á higa na wá, sesse jirire-aara mázla-aara parakke áza emnde. Gevge á ba áte una ndza a ndahesaa Dadaamiya saksage, a ba ɲane: Emnde a duniya bademme tá de fetaare á ba áte ɲane, tá de fansare ba ge ɲane palle. ²⁷ Ba Dadaamiya palle una edda á ilmu; adaba barka á Yaisu Almasiihu wá, ma vaatara keni galaumigálá ba ɲane palle. *Aamin.

lxx

Wakita á Dadaamiya
La Bible en wandala

copyright © 1999 Wycliffe Bible Translators, Inc.

Language: (Wandala)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 21 Feb 2024 from source
files dated 29 Jan 2022

dec75dd5-4784-5059-aa00-668d508a6b0d